

乾隆杭州府志

杭州府志卷一百八

人物 十三之仙釋三釋三

明

貝國器海寧人有異術弟子欲學之不傳也乃俟其遠出
開笥竊其書見國器在笥中嘗與鐵冠道人游白下同宿
值高帝微行假榻焉無枕枕斗國器夜起視天曰帝星臨
斗帝昂首聽之鐵冠曰尚離尺餘帝大驚明日召之至問
以國號年號所對皆帝心所定者益異之忽不見

浙江通志

謝真人逸其名杭人也不冠不羽亦不修鍊遇異人授以
道法不露也愛分水縣龍潭之勝往來憇止其上邑人何

氏兄弟與之友見其吐飯成蜂摘竹葉成魚人始異之明
太祖嘗設醺緘密疏焚之謝于壇下俯伏久而始甦問之
答曰三天門下觀見疏誦之不遺一字上駭然封三天門
下得道真人

神仙傳

至分水別何氏兄弟去至龍潭端坐石

上而化邑人立廟其地有禱必應遠近多崇祀焉

分水志

鄧羽南海人爲青陽令後爲道士常居武林後隱武當山
之南岩永樂中不知所往人以爲仙去有觀物吟一卷

武林志

外志

周思得字養真錢塘人行靈官法先知禍福文帝北征召
扈從數試之不爽

浙江通志

永樂中召赴京寓大德觀祈禱晴

雨呼召風雷累應每朝廷有問中貴賁御封詞旨赴觀設
香案焚之周不與知也頃之神降則歷歷指陳如見一日
神降頗怒周曰有旨故敢召神曰小事可瀆我耶問奚事
神曰失狸奴耳誤入某閣仰塵板中果于其處得之其他
靈驗不可殫記

西湖
塵談

嘗取諸家科範纂爲大洞金書行于

世累封高士真人尸解時年九十三葬八盤嶺

宗陽
宮志

柴真人善祈禱永樂中浙中大旱延至設齋壇三日後雷

響一聲壇前二旛結成二龍頭雨如注西湖涸其大半

續文

獻通
考

俞悟元相傳世居錢塘入元妙觀爲道士精清微五雷諸

階法宣德癸丑主席宗陽宮偕沈棲霞重構老君臺得月樓以復舊規前後開山二十餘處年八十二

元妙觀志

徐道彰號凝虛職任真人府贊教住通元觀能採三光之炁治襁兒之失明行紫庭追蟲法救癆瘵于幾危者遐邇醮禳必延請焉所獲金帛建三清等殿法相器具聿新築丹室數椽潛身修煉足不踰外者十數年至癸未長夏山亭忽有羣鶴飛鳴乃囑徒曰後三日我當去矣至期書偈趺坐而逝

許仁徐法師傳

閻蓬頭居雷峯最久冬浴冰水暑坐溺缶出而暴之無穢氣勸人行陰騭與巨公遊爲築巨麗宮觀一日坐逝吳百

戶家

萬歷錢塘縣志

俞大彰字用昭別號海空吳山重陽羽士也祈雨禳災芟

邪輔正歷五十餘年隨試輒效

重陽菴志

祝小仙粵人來游西湖寓于藕花居藕花居者高儀之別業也儀一日訪之小仙曰汝臥此儀未幾卒竟築其地爲墓後尸解三聖橋復有過諸粵者曰爲我寄聲謝武林舊

好

兩浙名賢外錄

許源號野雲棄武弁自演遊蜀過藍斗蓬得訣斗牛宮俄來修煉表忠觀傍以却病方致貴遊而實承王馬之派變貌須臾若八公年百八歲書頌坐蛻

萬歷錢塘縣志

唐秩得大梵斗姥五雷法禱雨佑聖觀運旗摩空雲轉如輪雨隨如注偶被疾見幢蓋來遂化去三年忽于市囂中

從褚幼文索所借書

錢塘縣志

慧朗字性原別號幻隱生于元世黃岩縣頂宅母陳氏出家後詣徑山叅元叟端公端云東嶺來西嶺來師指草鞋云此是三文錢買得端云更道師云只恁麼道久之究盡底蘊洪武五年詔建佛會于鍾山召高行沙門師與季潭

泐公與焉

續西湖高僧事略

懷潤字清遠晚號竹菴南昌魏氏子生而英發誦書攻文不待師授而知解日勝時全悟訢公以大中大夫住持大

龍翔寺聞之喜曰此吾宗千里駒也亟挽至座下一日悟
警勵諸徒衆未有對懷渭直前肆言悟此之氣不少沮如
是詰難至于再三悟笑曰汝可入吾室矣浙江行省丞相
康里公延主會稽之賓相未幾遷杭之報國全悟示寂囑
之曰能宏大慧之道使不墜者惟汝與宗泐爾淨慈請爲
住持洪武初奉詔至鍾山退居錢塘之梁渚

語錄

延俊字用章饒之樂平人甫薤出家弱冠薙髮謁全悟訢
于中天竺訢嘆曰子黃龍佛印流也訢住龍翔寺延居第
一座歷吳越大剎至正末主錢塘之淨慈洪武元年徙寓
鍾山示寂闍維舍利無算歸塔南屏山中葬曰天花如雨

淨慈寺志

梵琦字楚石明州象山朱姓元元貞二年生九歲從天寧訥公受業十六爲僧因閱楞嚴至緣見因明暗成無見本明自發則諸暗相永不能昏于此有省然于向上一着尚有滯礙元叟端公主徑山往叅謁問如何是言發非聲物前不物叟遽云如何是言發非聲物前不物叟遽云如何是言發非聲物擬進語叟振威一喝已而應書寫大藏之選至京師崇天門聞綵樓上鼓聲豁然大悟歸叅元叟叟笑迎曰且喜大事了畢

續西湖高僧事略

曇噩字無夢又曰夢堂慈溪王氏子師事雪庭傳公相宗

律部晝夜研摩教相既通篤意禪觀叅元叟端公于靈隱
機鋒交契命掌內記出世于浙東三名刹國師錫以佛眞
文懿禪師之號洪武初召對以年髦放還

明高僧傳

無愠字恕中臨海人族姓陳受度于元叟端公初居徑山
兩坐浙東名利投閒太白山中日本國王慕名奏請住持
召赴京師年幾七十上見憫特寢其奏賜歸天童故山

天童

寺志

宏道字存翁號竺隱桐鄉密印寺僧姓沈吳江人洪武丙
辰住持杭州上天竺注釋楞伽經與楚石同召入京爲左
善世辛未賜馳驛歸明秋跣趺而逝藏于天竺雙檜峯雲

隱塔

天竺寺志

輔良字用真號介菴吳縣人年十五從同里迎福院僧壽
彌薙髮卽慨然曰學佛將以明心心非師無以示肯綮終
日面牆可乎往見廣際卽以全器法寶期之尋掌藏鑰于
四明至正壬午行宣政院檄出世嘉興資聖寺遷越之天
童移杭之中天竺四坐道場解黏發覆如甘露之洒稠林
復以淨土觀門爲苦海舟航時兼修之

宋濂塔銘

愚海名普智姓葉氏海寧人讀華嚴經頓明教觀住持崇
惠有修蛇現于庭師囑曰果是天龍呈象宜現大身須臾
果現大身騰空而去洪武中詔入京師講華嚴住安國寺

舊志

智及字以中吳縣顧氏子入海雲院爲童子釋書與儒典並進其師嘉之見訢公于建業尋歸海雲見秋葉吹墜于庭豁然有省至正辛卯秋請住持徑山補寂照故處風動四方向者愈衆洪武癸丑詔有道浮屠十人集京師大天界寺師居其首以病不及召對乙卯賜還穹窿山山卽海雲所在也

宋濂塔銘

慧炬諸暨人住理公巖洪武初海潮衝岸壞民居廬爲潮

神說三皈戒楊枝洒處卽止不崩時稱炬菩薩

靈隱寺志

慧日號東溟天台人洪武初召見說毘尼淨戒辭歸天竺

山修西方安養之學夢青蓮花生方池中花色敷腴清芬
襲人既寤召弟子曰此生淨土之祥也吾去人間世不遠
乎至四日趺坐書頌合爪而寂年八十有九

宋濂
塔銘

慧林字萬松別號雙徑仁和人聞猿鳥之音豁然有悟入
京師徘徊諸講肆中研究元奧夜宿通堂聞一僧誦丹霞
上堂公案尤大了了時伏牛空幻叟止廣德禪林乃詣叟
自陳所解遂得法素通三藏尤精于圓覺金剛法華楞嚴
諸經爲人講說津津靡厭其人領解乃止

方九敘
撰塔銘

景隆字祖庭號空谷姑蘇洞庭陳氏子永樂壬辰從弁山
懶雲和尚受學叅禪雖家居而湖海禪伯靡不叅謁出家

詣杭州昭慶受戒住靈隱往天目禮祖塔慈錫一載刻苦
叅究忽有省造頓雲剖露雲印可之頓雲臨濟下二十四
世也

續西湖高僧事略

知淳名朴庵菩提接庵守公之嗣也正統間請至昭慶奉
旨開壇說戒爲天下傳戒宗師後主靈芝寺已亥辭于朝

沐浴而逝骨歸靈芝築塔

昭慶寺志

常在號別峯本江陰陳氏子方晬值亂兵掠其境母携之
避走驚懼墜水不能救次日兵見錦襦小兒浮水面舉取
其襦而體尚溫俄頃遂甦異之乃携歸邑民張勝爲養子
遂冒張姓甫成童杭之集慶寺僧正純聞兒受難事甚苦

求爲徒張卽捨之因名常在旣長爲僧住天界寺謁曇噩
見其貌偉而聲如鐘器之俾領綱維洪武二十年補雞鳴
寺住持召對稱旨久之太祖召僧錄司官諭曰前住雞鳴
寺僧有福可住育王寺越數載元教宏敷宗風遠揚永樂
二年十月十三日無疾而化闍維五色舍利纍纍然

周世昌

山志

興古爲大會首座一日病歸聞雷立化時又有棲雲菴空

江者念佛旋繞亦倚杖立化

萬歷錢塘縣志

圓會居天聖廢寺勤課誦不踰閏飯僧數十萬持戒精嚴

及逝暑月不潰弟子本能咒鳥下集飯之如僧

錢塘縣志

立中錢塘孫氏子十三出家投慈光寺受具謁淨慈祖芳
深器之命入室侍香歸造北郭普明禪寺退席重整本山
宏開法席正統辛酉六月上堂說偈曰今年八十一老病
隨緣且遣日今年記着後年事後年記着今朝日至癸亥
焚沐坐化日月無爽停龕九日不變如生荼毘獲舍利無

筭

武林
梵志

本善鳳陽人姓吳稚小以佛事爲兒戲十五出家源明示
以無字公案正統八年入閩叅無際師聞鐘聲有省次見
蒙隱次見楚山次見月溪溪印可之從前打七掩關曉夜
無怠歷盡百倍苦功乃得大徹天順庚辰趙氏建西湖三

塔寺請師開山

竊西湖高僧事畧

雪庭一號梅雪隱人貫仁和姓桂十五尋師唯益邪解成
化癸巳叅休休翁于仙林寺一見契合受無字公案十七
祝髮日夜研究滯沉寂之境閱楞嚴于一毫端現寶王刹
有疑後在乾明寺覩萬佛閣偶會毫端現刹之句宏治改
元除夕聞鐘聲數年行履忽爾活脫又隨休休翁于淨慈
乃蒙印可

雲棲
法彙

祿宏字佛慧號蓮池仁和沈氏子爲博士弟子試必高等
一日閱慧燈集失手碎茶甌有省乃于世相作一筆勾歌
棄而事佛得五雲山古雲栖寺故址結茅默坐弟子日進

孝定太后繪像宮中禮焉賜蟒袈裟不敢服破衲敝幃終

身莫改

西湖夢尋

其設清規益嚴肅衆有通堂若精進若老病

若十方各別有堂百執事各有寮啓閉以時夜有巡警擊

板念佛聲傳山谷極意戒殺放生著文久行于世海

內多尊奉之師悲幽冥苦趣自習酸口時親設放嘗有見

師座上現如來相者蓋觀力然也

釋德清撰墓志

三十二歲辭家

祝髮徧叅諸方見雲栖山水幽寂有終焉之志結茅三楹

絕糧七日倚壁危坐環山多虎患爲諷經施食虎遂遠徙

歲大旱擊木魚循田念佛雨隨足跡而注居民德之遂成

蘭若首倡毘尼以立基本單提念佛以攝禪淨臨示寂張

目云老實念佛莫捏怪勿壞我規矩向西念佛而逝師初
出家語繼室湯氏曰生死事大汝其勉之湯省悟亦出家
孝義庵法名株錦

國朝雍正十二年

勅封淨妙真修禪師

浙江通志

真可字達觀吳江沈氏五歲不語有異僧過其門摩頂謂
曰此兒出家當爲人天師言訖不見遂能言十七宿虎邱
僧舍聞僧夜誦八十八佛名心大悅侵晨卽剃髮遊五臺
至京師叅徧融笑巖諸老發明大事歸吳復楞嚴廢寺于
嘉禾創刻藏經于徑山精嚴戒律化後十二年葬于徑山

茶毘之日肉身儼然舍利無筭

徑山志

真中海寧孫氏子年十七投安國寺受具自以根鈍不能憶持伽陀六時虔禮大士以祈淨慧一夕仆地若人以凉水灑面遂有省與藏主涵春繙閱經律往復圓辨叅東禪深研止觀後歸安國禁足立限既老遵法器得受汰曰吾受涵師屬累今付得人吾願已畢抵雲岫數日端坐唱佛而化

浙江通志

受汰字平觀寧邑吳氏子九歲出家安國迴泉深器之擔登天台徧禮智者大師道場歸就西峯落成精舍蔚爲叢林海內從事台教者翕然歸向壬辰冬示寂坐逝

舊志

湛然名圓澄會稽夏氏子得法于曹洞清涼大覺禪師萬
歷間住徑山所著有宗門或問慨古錄思益簡註楞嚴臆
說法華意語涅槃疏金剛三昧等卷凡建大刹五築石塘
一百五十里屢著神異遠近宗之

西湖志餘

如馨字古心江寧楊氏子詣栖霞千佛嶺出家往五臺三
步一禮千有餘日始到山中遙見金碧樓臺五峯放光結
成雲蓋大士于光中垂手摩其頂曰文殊爲汝受戒師卽
頓悟萬歷四十一年詔賜紫衣

昭慶寺志

承芳與古心比肩弟昆及在昭慶開講古心駐錫靈隱開
戒師以弟子禮謁求戒先一夕夢韋天囑之曰文殊菩薩

化身南來受戒古心意不謂師當之也三壇畢師以疾不
赴古心忽憶前夢來昭慶問疾卽于榻上說沙彌十戒爲
摩頂已戒得威力身不由已勇猛精進盥漱更衣下榻求
具更爲集僧具儀傳授菩薩大戒受畢回五臺慈聖太后
夢感文殊菩薩肉身還山物色及師遂詔師主五臺傳戒
師辭曰纔登戒品行持未全上乃移命古心三年期滿古
心奏辭寺任付囑繼其法席

慧雲大律師本傳

廣印字聞谷年十三祝髮于杭之開元受菩薩戒于雲棲
攝靜于西溪法華重規疊矩爲東南法席之最紫柏雪棲
海印入滅其真修退藏密傳三老之燈者唯師一人而已

有語錄後隱居不知所終

萬歷舊志

廣承字紹覺士橋潘氏子質弱而尪販大覺爲弟子所居
數椽晝操作夜課誦經行不卧初聞法華元義心識分會
之非偶與辯者晰大義卽能折其鋒回禮雲棲有感不窺
戶者六年所居庵初名勝蓮避雲棲老人字易曰蓮居萬
歷己酉講法華甫畢忽命弟子大真嗣講朗誦大乘經西
逝

萬歷錢塘縣志

大真號新伊杭郡周氏子兒時聚沙爲塔能趺坐九歲依
紹覺頗有神解二十八入雲栖受具戒博窺三藏叅證諸
宗居恒禮懺或修觀歷寒暑以爲常暇則搜釋舊聞著唯

識論合響若干卷行世

新法師
壙志

道盛字覺浪別號杖人浦城張氏子東苑鏡禪師法嗣坐
道場五十三處禪律精嚴嘗示衆云有血性漢被世界磨
成無血性漢被世界磨滅示寂後塔于栖霞山有學庸宗
旨莊子提正儒宗三寶及語錄百餘卷

虎跑
寺志

泗洲庵僧不知何許人嘉隆間住泗洲庵戒行嚴謹機鋒
不露遇歲飢煮菜葉及草卉食之無瘠容年七十餘忽自
往市大缸二置庵後穿土先瘞一缸以一缸置其側一日
囑其徒曰某日當西行三日後昇余坐缸中以外缸覆之
卽覆以土毋效俗僧多事也至期趺坐而逝體柔輒如故

方知爲有道僧也

舊志

康齋不知其名四川人崇禎間至富陽栗塢山枯坐石洞
一日忽語里人曰貧僧欲去乞薪若干屆期屑薪于空地
趺坐其上以油布帽覆首吐三昧自焚觀者如堵火已發
忽舉帽向人呼曰大衆信女中有生氣相冲火不得化請
各退避衆詢之果有孕婦輒命去復以帽自覆火遂大舉
須臾而盡其徒收骨藏洞中

西湖志餘

西來上人亡其名廬清平山巔不造城市晝夜瞑坐飢採
松柏葉爲食後忽解文字識醫理辨死生輒奇中今是山

有西來菴以上人得名

武林談叢

國朝

周大纘字恢焉錢塘豐寧里人少補諸生隨父宦江西之永福縣會大旱有方士能禱雨術頗奇遂從之游得其所學父葬于學士橋之南就其地築土室爲廬居之所不設門戶僅留一竇命家人傳餐而已康熙中年八十二杜門已歷四十餘年矣一日無疾坐逝吐白光如烟雲數夕乃散

清波小志

蔡道復錢塘人大纘友也明時曾爲處州叅將棄職散千金于宗族親串隱青田山中能鍊金丹自云得黃老長生術紫氣奕奕恒如二十許人晚乃卜築吳山三茅觀下已

而去不知所終

吳農祥集

赤脚仙不知何許人常默不食一食則兼十人猶未饜冬大雪呼居停主掃雪聚成小廬居其中須臾氣拂拂騰上聚雪皆化與之言多中人隱

浙江通志

孫道元別號復陽子桐川人初生不啼不乳者彌月忽聞空中語乃受乳七齡求出家送吳山火德廟爲道士二十四謁張真人受正一清微五雷大法呼召風雷星將之方後遊禹航樂大滌山川結茅爲團瓢棲于宮側輒有甘泉湧出方丈之左預示化期沐浴更衣書偈而逝神氣如生

鼻垂玉柱

孫善長法師碑記

張守常居三茅觀感張三丰至與之談元便爾通神一日

誦黃庭經聞異香滿室而化殮後舉棺若空

清波類志

和有鴻字公鑑少學法華陽衍教天壇後爲宗陽宮都紀

禱雨祈晴有求輒應尤能驅邪辟疫年七十三無疾逝

錢塘

縣志

金尚漢字建三海寧人五歲投吳山藥王廟稍長卽叅元

奧從錢唐儒者馮晉宣遊四十餘年博洽多聞又從張真

人得授祈禱秘訣歸杭後仍于藥王廟斗姥閣爲住持雍

正乙卯秋旱禱雨有驗後應禱者六次杭人尊禮之

清波類志

施遠恩字魯瞻法名冲暉號兩山仁和人十歲有出塵想

依族叔允文於吳山長生房雍正壬子應選詣京師侍光
明殿妙正真人左右道法樞要時有心契乙卯

世宗憲皇帝賜題賦詩稱

旨授龍虎山提點凡十餘年乾隆丁卯辭歸故山惟好靜養乙巳
夏大旱登壇祈雨甘霖三日後屢禱輒驗丁亥冬羽化邑

人萬福刊其環山房詩行世

眉雨蒼
撰行畧

圓融西蜀人年十六出家得戒于天童密雲隨侍天台叅
報恩遊大雄次至金剛庵壬寅七月忽語衆曰吾初六歸
去至日從容禮佛辭衆入龕昇至塘南村院從龕中自開
兩門取香三枝說偈仍自掩龕祥烟西颺而化

浙江
通志

明方字石兩武塘陳氏子投法相薙染閱楞嚴我真文殊
無是文殊義通身汗下叅雲門得印授以斷拂子一柄遂

號爲斷拂子

舊浙江
通志

方宜字夢曙茗人出家法相寺左筆善書有詩名年十九
有悟盡棄章句續雲栖放生之會不替者三十年康熙元
年仲冬徧禮佛像集徒講演金剛經一卷次日至大江濱
卓杖大聲曰好江水遂卓立而化

浙江
通志

本金少爲諸生乙酉秋落髮爲僧于蓮居庵庵在土橋東
乃紹覺孕蓮胎處紹覺者蓮池十大弟子中一人也紹覺
授新伊新伊授德水及本金戒律精整諸僧無過之者

舊志

超直號問石郵縣陳氏子來錢塘薙髮于湖南之白蓮州
受虛舟付囑當機敏捷少嘗讀書後得空力輒能解卷帙
之蘊張蒼水就義超直與張仲嘉輩收而瘞之南屏之原
後立化于臥榻側大書案上曰斬斷葛藤

清波小志

德修錢塘人寓方家峪茶亭薙髮習靜北山窮谷中面壁
二十年康熙七年元夕自炊水沐浴說偈入龕趺坐翌日
火自內出頃刻而化

錢塘縣志

大涵吳江人俗姓潘九歲出家既長入靈岩從師繼起遊
南岳有名楚僧忌之謀折其足乃夜遁走大雪中飢則搏
雪食之自號喫雪子後在黃山聞樵伐木聲有悟盜擊之

不死

陳元龍雁
公塔記

明源字德水晚號寶輪生年十五禮月輝爲薙髮嗣見新
伊法師于蓮居爲授清涼大鈔一夕夢登妙高山從口中
流出香水須臾成海中有千蓮葉不覺身坐其上從此智
光煥發徧叅講席歸鍵室乳竇峯下自誓終身居學地不
肯任匡領事新伊付囑屢辭始受自是戒壇講席應四方
之請者無虛歲所刊行有楞伽引

上天
竺志

宏禮號具德會稽張氏子從漢月藏苦叅十七年授以衣
拂在天寧學侶奔轅順治初靈隱寺燬卓錫鼎建康熙丁
未從徑山至天寧一日顧謂法嗣原志曰我十九日到上

方法須用汝代說至期曉起更衣呼曰隨我上方去頓足

一下遂示寂

西湖志餘

成法初名續法字伯亭仁和沈氏子九歲禮慈雲祖源爲師十六薙染十七圓戒二十叅乳源德水法師聽講楞嚴宿慧駿發洞澈微旨嘗論天台賢首之異同乳峯曉以雲栖之說言下大悟遂受囑精研四分律開講于慈雲重建聖果仁壽諸寺康熙二十八年主上天竺

聖祖仁皇帝南巡勅賜優渥

徐自洙撰塔銘

書玉字宜潔武進唐氏子甫能言常口誦佛號入加山寺禮月謙薙髮癸亥冬赴昭慶受戒檀護請爲寺主倡率大

衆以身立範

聖祖南巡三賜法寶年近旬日誦梵經四分無間

敬業堂集

篆玉號讓山仁和桐扣人少出家南屏萬峰山房後主講

桐鄉龍翔寺工吟咏有話墮集化後葬南屏

武林耆舊志

調梅名明鼎楚之黃梅人二十受戒深究本分徧參宗匠以明心見性見稱康熙庚子主理安悶八載

世宗憲皇帝宣取入京住柏林寺嘗入見奏對稱

旨賜紫衣如意轉輪藏物癸丑退柏林南還守夢庵塔院乾隆三

年住萬壽寺並掌僧錄印務

理安寺志

明乾字仁化號二愁奉化馬氏子年二十三落髮于普陀

法華洞明年于西湖昭慶律寺受具得度旋習靜艮山門
外報恩院遍叅諸方道望日進雍正十一年嗣法于無閼
永覺禪師蒙

賜紫衣及盃杖如意

勅住西山法海主席十年乾隆元年奉

命住拈花寺十六年移住萬壽寺旋以老病乞歸舊山卽所居

報恩院也歸三年示寂

梁同書
撰塔銘

明中字焚虛桐鄉施氏子七歲出家秀水楞嚴教寺雍正

十二年叅方至京師

世宗憲皇帝于千僧中選留有根器者二十二人明中與焉

特旨住吉祥苑池南叅究禪學乾隆元年還本籍四年得法于無
闍六年主席聖因寺十六年進

聖駕南巡頌命和

御製詩日未移晷恭進一律是年冬入都祝

皇太后萬壽賜如意一握二十二年移住淨慈邀

賜紫三次暨

御製詩及對聯三十二年退院命法嗣實蔭代其事

道古堂集

果證字懷德歸安俞氏子年十六出家杭州吉祥寺康熙
辛丑受具于昭慶律僧德先尤爲澄如所器俾繼法席精
修梵行著律儀法數三十二卷爲從來禪釋所未備說戒

者三十三年受具者約萬餘衆

恩賜御書深入定慧扁額庚寅秋退院居香光室丁酉冬趺坐

念佛而寂

金甌撰
塔銘

杭州府志卷一百九

雜記

統覈史事不遺細微而模山範水者好搜幽僻論者謂宋人說部多存掌故備攷證可以補子之遺而裨史之闕豈徒以資談助哉杭州文物所聚自宋以後裨乘較多擇其雅馴者彙書件繫庶有益於多聞

天目山有二水一條東流經於潛臨安百五十里至餘杭爲苕溪又東三十里抱錢唐又東北流六十里過湖州入太湖一條西趨於潛爲紫溪合桐廬之水匯于錢唐此郭璞所謂天目兩乳也南山如龍北山如鳳此郭璞所謂龍

飛鳳舞也海門一日兩潮日輪正從鯨子門上此郭璞所謂金星也郭璞留識蓋預知五百年潮打西興爲都會矣

太平寰宇記

富春有桑君者養犬數年不吠孫文臺微時經此犬忽吠之桑謂文臺曰君其異相乎及貴欲報桑無所好惟好張

筭捕魚文臺爲作九里筭以贈之文臺堅字也

元和郡國志

吳時富陽董昭之嘗乘船過錢塘江中見一蟻著一短蘆走回復顧望甚皇遽因以繩繫蘆船上至岸蟻得出夜夢一烏衣人謝云僕是蟻中王也感君見濟後有急難當相告語歷十餘年昭之被橫錄忽思蟻王之夢因取三四蟻

著掌中語之夜夢烏衣人云可急投餘杭山中旣寤過江
投餘杭山旋遇赦得免

齊諧記

唐以前自杭至嘉皆懸流其南則水草沮洳以達于海故
水則設閘以啟閉陸則設棧以通行古胥山碑謂石棧自

錢塘北抵禦兒之胥口乃其證

紫桃軒雜綴

錢塘風物湖山之美自古詩人標榜爲多如謝靈運云定
山緬雲霧赤亭無淹薄鄭谷云潮來無別浦木落見他山
張祐云青壁遠光凌鳥峻碧湖深影鑒人寒錢起云漁浦
浪花搖素壁西陵樹色入秋窗之類皆錢塘城外江湖之
景蓋行人于解鞍繫纜頃刻所見城中之景惟白樂天所

賦最多所謂潮聲夜入伍員廟柳色春藏蘇小家大屋簷
多裝雁齒小航船亦畫龍頭燈火萬家城四畔星河一道

水中央至今尚有可考

韻語
陽秋

權德輿有贈天竺靈隱二寺主絕句云石路泉流兩寺分
尋常鐘磬隔山聞山僧半在中峰住共占清猿與白雲二
寺在吾杭絕勝處今山寺宛然僧居如故所欠者惟清猿

耳

蓉塘
詩話

前輩任杭州而去者往往思之雖其山水清佳亦其民風
淳樸易感也白樂天則云自別錢塘山水後不多飲酒懶
吟詩又云所嗟水路無三百官繫無由得再遊又云渺渺

錢塘幾十年想君到後事依然又云江南憶最憶是杭州
山寺月中尋桂子郡亭枕上看潮頭何日更重遊子瞻則
云寄謝西湖舊風月故應時許夢中遊又云居杭積五歲
自憶本杭人故山歸無家欲買西湖鄰又云前生我已到
杭州到處長如到舊遊更欲洞霄爲隱吏一巷閒地且相
留二公之戀戀于舊遊蓋必有以取之耳

西湖遊
覽志

牡丹唐時邑無此種長慶間開元寺僧惠澄自都下得一
本謂之洛花白樂天攜酒賞之張祜有風流都是錢塘守
不踏紅塵看牡丹之句宋吉祥寺獨盛蘇子瞻有牡丹記
敘靈隱寺蓮花峯下紅辛夷及菩提寺南漪堂杜鵑縣治

羅江東隱手植海棠元祐時猶存皆有名而玫瑰花則宮苑都採之雜腦麝以爲香囊鳳仙花之名女兒花由李后小名鳳娘六宮避諱耳胡吳門菊譜云得自范村者爲三十六種而史正志吳門菊譜列二十九種種以黃爲首其品甚多有千葉大紅萬鈴深紫雙絞純白茸綠鵝黃二色銀臺者今復種種間出他如滿覺壠之桂花北山之梔子金燈南山之李花石雲山之蘭蕙六橋之桃花芙蓉彼河陽空得花縣名若錢塘真花縣也

錢塘縣志

唐大中初歲旱農人汲水灌田殊苦忽遇一老人云何不往此山下禱于獨鶴仙人必有奇應言畢卽去農人追至

餘杭界及之懇問所由乃稱是皇甫真君主此方休咎歸

如言禱之雨卽至後有禱輒應卽天柱山菴也

新城縣志

錢塘有聞人紹者常寶一劍以十大釘陷柱中揮劍一削
十釘皆截隱如秤衡而劍鏃無纖跡用力屈之如鈎縱之
鏗然有聲復直如絃關中神謬亦畜一劍可以屈置盒中
縱復直張景陽七命論劍曰若其靈寶則舒屈無方蓋自
古有此一類非常鐵能爲也

夢溪筆談

白樂天杭州春望詩有紅袖織綾誇柿蒂青旗沽酒趁梨
花之句所謂柿蒂指綾之紋也夢梁錄載杭土產綾曰柿
蒂狗脚皆指其紋而言後人不知改爲柿葉妄矣

錢塘詩話

青甃器皆云出自李王號秘色又曰出錢王今處之龍泉
出者色粉青越乃艾色唐陸龜蒙有進越器詩云九秋風
露越甃開奪得千峯翠色來好向中宵盛沆瀣共嵇中散
關傳孟則知始于江南與錢王皆非也近臨安亦自燒之

殊勝二處

雲麓漫抄

歐陽公五代史敘列國云聞諸故老謂吳越嘗稱帝改元
而求其事蹟不可得頗疑吳越後自諱之宋時王順伯收
臨安府故碑有石屋崇化寺幢題天寶四年明慶寺幢題
天寶五年九里松觀音尊勝幢題寶大二年水月寺幢題
寶正元年招賢寺幢題寶正二年小昭慶金牛瑪瑙等九

幢皆題寶正貢院橋柱題寶正六年至今寺中石塔有吳越王并年號處皆鐫剗模糊蓋歸宋納土時所改爾

西湖遊覽

志餘

武肅王以梁開平四年八月築捍海塘怒潮急湍晝夜衝激版築不就表告于天云願退一兩月之怒濤以建數百年之厚業禱胥山祠云願息忠憤之氣暫收洶湧之潮函詩一章置海門云傳語龍王并水府錢塘借與築錢城因採山陽之竹令矢人造爲箭三千隻羽以鴻鷺之羽飾以丹硃鍊剛火之鐵爲鏃旣成用葦敷地分箭六處幣用東方青九十丈南方赤三十丈西方白七十丈北方黑五十

丈中央黃二十丈鹿脯煎餅時果清酒棗脯茅香淨水各
六分香爐布置以丙夜三更子時屬丁日上酒三行禱云
六丁神君玉女陰神從官兵六千萬人鏐以此丹羽之矢
射蛟滅怪渴海枯淵干精百鬼勿使妄干唯願神君佐我
助我令我功行早就禱訖明日募強弩五百人以射濤頭
人用六矢每潮一至射以一矢射止五矢潮乃退

吳越
備史

錢塘江錢氏時爲石隄隄外又植大木十餘行謂之澁柱
寶元康定間人有獻議取澁柱可得良材數十萬杭帥以
爲然旣而舊木出水皆朽敗不可用而澁柱一空石隄爲
洪濤所激歲歲摧決杜偉長爲轉運使人有獻說自浙江

稅場以東移數里爲月隄以避怒水衆水工皆以爲便
獨一老水工以爲不然密諭其黨曰移隄則歲無水患若
曹何所衣食衆人樂其利從而和之偉長不悟其計費以
鉅萬而江隄之害仍歲有之近歲乃講月隄之利濤害稍
稀然猶不若滉柱之利但所費至多不復可爲

夢溪筆談

市井間所印百家姓是兩浙錢氏有國時小民所著何則
其首云趙錢孫李蓋錢氏奉正朔趙氏乃本朝國姓所以
錢次之孫乃忠懿王之正妃又其次則江南李氏次句云
周吳鄭王皆武肅而下后妃無可疑者

錢塘外紀

吳越王妃每歲歸臨安王以書遺妃云陌上花開可緩緩

歸矣吳人用其語爲歌含思宛轉聽之凄然蘇子瞻爲之
易其詞蓋清平調也調云陌上花開蝴蝶飛江山猶是昔
人非遺民幾度垂垂老遊女長歌緩緩歸陌上山花無數
開路人爭看翠輦來若爲留得堂堂去且更從教緩緩回
生前富貴草頭露身後風流陌上花已作遲遲君去魯猶

歌緩緩妾回家

委巷叢談

唐杭州刺史相里君志不載其名元和間任余案獨孤常
州集中有祭相里造文云舒州刺史獨孤及敬祭于河南
少尹贈禮部侍郎相里公之靈伊昔密薦可否廷折克佞
京師童兒亦知公名其後江人杭人頌德不暇洛表耆老

侯公而蘇云云蓋從江州移杭州後終于河南少尹也其
字曰公度又考白香山冷泉亭記云先是領郡者有相里
君造虛白亭造字下必本有作字後人疑造作文複而剛
去作字不知造是相里君之名也白記于其下云有韓僕
射舉作侯仙亭有裴庶子棠棣作觀風亭有盧給事元輔
作見山亭及右司郎中河南元稹最後作此亭後四君皆
稱其名白去相里君年代非甚遼邈無緣舉世遂無有知
其名者今以白記證之獨孤之文尤瞭然也志置之韓舉
盧元輔之後非是當据白記移之于前志所云元和間任
者直臆說耳

盧文弔相
里君考

臨安有諺語凡見人不下禮呼曰強團練余不知其所自
來後得之長老云錢氏有國時攻常州執其團練使趙仁
澤以歸見王不拜王怒命以刀抉其口至耳丞相元德昭
救解云此強團練宥之足以勸忠也遂以藥敷創送歸于

唐故至今以爲美諺

楓窗小牘

范文正公仲淹鎮錢塘兵官皆被薦獨巡檢蘇麟不見錄
乃獻詩云近水樓臺先得月向陽花木易爲春公卽薦之

清夜錄

周韶好蓄奇茗嘗與蔡君謨鬪勝題品風味君謨屈焉蘇
子容過杭太守陳述古飲之召韶佐酒韶因子容求落籍

子容指簷間白鸚鵡曰可作一絕韶援筆立成云隴上巢
空歲月驚忍看回首自梳翎開籠若放雪衣女長念觀音
般若經時韶有服衣白一座稱賞遂落籍

堯山堂
外紀

宋時錢塘陶禹錫名與登進士第其高祖謂之陶四翁開
染肆嘗以四百萬錢市紫草有駟者至視之曰此蒸壤草
也澤皆盡矣不可用四翁試之信然駟者曰無憂某當爲
翁分諸小染家明日駟者至四翁盡取草對其人一燕而
盡曰寧我誤豈可誤他人耶時陶氏資尚薄其後富盛累

世子孫登第者數人

錢塘
縣志

宋學士陳堯佐授外臺日謂道士馮得之曰嘗夢遊名山

見仙人以鼎鼐相期何敢過望馮曰學士人望所歸名列
仙籍世間富貴何足相挽後果大用造紫石巨鼎二置祥
光亭上其銘曰鑪之質剝中起煙人之體虛心養元不用
之用自然而然鑪兮人兮茲謂道焉其二銘曰山之高兮
巉巖出雲洞之深兮幽幽宅真鸞鶴一瞬鳬鷺百春安得
而往葆光嗇神其一久亡往年尚有一在亭下而今毀矣

洞霄宮

紀異

林逋隱居孤山常蓄兩鶴縱之則飛入雲霄盤旋久之逋
常汎小艇遊西湖諸寺有客至則一童子出應門延客坐
閒籠放鶴良久逋必擢小艇而歸逋高逸倨傲多所學惟

不能基謂人曰逋于世間事皆能之惟不能擔糞與著基

古懌
錄

歐陽文忠嘗愛林逋詩草泥行郭索雲木叫鉤輶之句文
忠以爲語新而屬對親切鉤輶鷓鴣聲也李羣玉詩云方
穿詰曲崎嶇路又聽鉤輶格磔聲郭索蟬行貌也揚雄太
元曰蟹之郭索用心躁也

夢溪
筆談

詩牌始製于林君復君復詩牌詩云蟲方標勝槩讀處卽
忘歸靜壁懸虛白危樓釘翠微清衙時亦有絕唱世還稀
一片題誰作吾廬水竹圍

識小
錄

宋時錢塘兩處士其一林和靖其一徐冲晦冲晦居萬松

嶺一菴岩堯于嶺之上東望江西瞰湖正與孤山相對而和靖之廬隱見于烟雲杳靄間遐想高風令人慨然也和靖廬孤山有一室在靈雲澗側旦晚多居之二人相較和靖名尤高冲晦以數學顯嘗戒其子孫曰凡我子孫世世不得離錢塘以永無兵燹也

錢塘縣志

祥符天禧間士之風節文學名天下者陝郊魏仲先錢唐林君復二人又皆工于詩方是時天子修封禪告太平有二人下麟鳳芝草不足言矣君復書法又自高勝絕人予觀上竺廣慧法師所藏二帖不覺起敬立法師能捐一石刻之山中使吾輩皆得墨本以刮目散懷亦一奇事也

和靖工書人多不知其所著書有西湖紀逸一卷摘句圖一卷姑熟志五卷省心銓要率皆不傳而和靖詩集三卷乃諸孫大年緒集

陸游跋林和靖帖

葉曙杲卿師事林逋天禧末錢唐有巨石浮于江太守問逋逋以問杲卿乃按樵子五行志以對歷歷皆驗于是人服杲卿多聞而始知樵子爲奇書也

錢塘縣志

張子野過和靖隱居有詩一聯云湖山隱後家空在烟雨詞亡草自青注云先生常著春草曲有滿地和煙雨之句今亡其全篇余按楊元素本事曲有點絳唇一闕乃和靖草詞云金谷年年亂生春色誰爲主餘花落處滿地和煙

雨又是離歌一闕長亭暮王孫去萋萋無數南北東西路
此詞甚工子野乃不見其全篇何也

藝苑
雄黃

宋元豐己未趙清獻抃再帥錢塘抗章告老歲甲子八月
忽來遊山謂道士沈日益曰近夢入真徑宮關巍峩有數
道士相迓詢之曰此洞霄宮既覺思之兩典是郡未嘗至
此故冒暑來今觀泉石樓觀與夢中所見無異豈仙聖有

緣耶留詩紀事

洞霄宮
紀異

東坡先生臨錢塘日有訴負綾絹錢二萬不償者公呼至
詢之云某家以製扇爲業適今春已來所製不售非固負
之也公曰姑取汝所製扇來吾當爲汝市也扇至公取白

團夾絹二十就判筆作行草及枯木竹石頃刻而盡卽以付之其人抱扇謝出始踰府門而好事者爭以千錢取所持立盡遂盡償所逋

春渚紀聞

東坡鎮餘杭遇遊西湖多令旌旗導從出錢塘門坡則自湧金門從一二老兵汎舟絕湖而來飯于普安院徜徉靈隱天竺間以吏牘自隨至冷泉亭据案剖決落筆如風雨分爭辨訟談笑而辦已乃與僚吏劇飲薄晚則乘馬以歸夾道燈火縱觀太守有老僧紹興末年九十餘幼在院爲蒼頭能言之

梁溪漫志

東坡在杭州作有美堂會客詩領聯天外黑風吹海立浙

東飛雨過江來或疑海不能立黃魯直曰蓋是爲老杜所
誤因舉三大禮賦朝獻太清宮云九天之雲下垂四海之
水皆立以告之二者皆句語雄峻前無古人坡和陶停雲
詩有云雲屯九河雪立三江之句亦用此也

容齋
四筆

東坡平生衣服飲食皆草草至杭州時常喜至祥符寺琴
僧惟賢房閒憇至則脫巾褫衣露股榻上令一虞候搔爬
及起視其岸巾止用一麻繩約髮耳又築新堤時坡日往
視之一日飢令具食食未至遂于堤上取築堤人飯器滿
貯陳倉米一器盡之其平生簡率如此

北窗炙
輟錄

杭州之美得白蘇而益章考其治績性情往往酷似樂天

詩云閭里固宜勤撫卹樓臺亦要數躋攀子瞻亦云細雨
晴時一百六畫橈鼙鼓莫違民樂天詩云笙歌委曲聲延
耳金翠動搖光照身子瞻亦云剩看新翻眉倒暈未應泣
別臉消紅樂天詩云故妓數人憑問訛新詩兩首倩流傳
子瞻亦云休驚歲歲年年貌且對朝朝暮暮人樂天取天
竺奇石受代詩云三年爲刺史飲冰復食檠唯向天竺山
取得兩片石此直抵千金母乃傷清白子瞻亦云在郡依
前六百日山中不記幾回來還將天竺一峯去欲把雲根
到處栽蓋子瞻景慕惟在樂天故摹擬之詞比比歌詠如
云出處依稀似樂天敢將衰朽較前賢又云但遣先生披

鶴肇不須更畫樂天真殆有夢寐羹牆之想矣

西湖遊覽志

梵天寺在鳳凰山之右石幢高聳皆鐫吳越名號今模糊不復辨矣其寺之伽藍乃東坡也禪家取東坡溪聲便是廣長舌山色豈非清淨身二語以爲見道不若其題梵天五古云但聞煙外鐘不見煙中寺幽人行未已草露濕芒屨惟應山頭月夜夜照來去一詩色相俱空已臻上乘其成佛當不在靈運下也矧伽藍乎梵天有東坡猶鶴林有米老能令旃檀林頓添佳話

湖濱雜記

僕在黃州參寥自湖中來訪館之東坡一日夢參寥所作詩覺而記其兩句云寒食清明都過了石泉槐火一時新

後七年僕出守錢塘而參寥始卜居西湖智果院院有泉
出石縫間甘冷宜茶寒食之明日僕與客泛湖自孤山來
謁參寥汲泉鑽火烹黃檗茶忽悟所夢詩兆于七年之前
衆客皆驚歎爲作應夢記知傳記所載非虛語也

東坡題跋

可久喜爲詩東坡監郡日與爲詩友居西湖孤山坡來守
錢塘當元夕九曲觀燈去從者獨行入師室了無燈火但
聞簷蔔餘香歎仰留詩有不把琉璃閒照佛始知無盡本
非燈之句

武林梵志

東坡遊西湖僧舍壁間見小詩云竹暗不通日泉聲落如
雨春風自有期桃李亂深塢問誰所作或告以錢塘僧清

順者卽日求得之一見甚喜而順之名出矣

竹坡詩話

東坡畫梅有竹外一枝斜更好之句此便是坡作一竹梅圖但未下筆耳每咏其句便如行孤山籬落間風光物采來照映人應接不暇也

捫虱新語

蘇文忠詩初若豪邁天成其實關鍵甚密再來杭州壽星院寒碧軒詩句句切題而未嘗拘其云清風肅肅搖窗扉窗前修竹一尺圍紛紛蒼雪落夏簾冉冉綠霧沾人衣寒碧各在其中第五句日高山蟬抱葉響頗似無意而杜詩云抱葉寒蟬靜併葉言之寒亦在其中矣人靜翠羽穿林飛固不待言末句却說破道人絕粒對寒碧爲問鶴骨何

緣肥其妙如此

二老堂詩話

黃庭堅謝景初子壻也往還富陽從景初學詩竟以詩名

家

富陽縣志

西湖藏春塢門前有一古松凌霄花絡其上蘇公嘗爲僧

清順賦詩今百餘年其花猶茂

全芳備祖

杭州洞霄宮自熙寧初設有提舉高宗南渡特改內祠崇其體貌以提舉受祠祿歲有其人稽之國史合之野紀其先後倫序爵里姓名可得而考也鄧牧心所撰大滌洞天志建炎以後主是祠者均未之載爲補錄書之自建炎訖咸淳凡一百一十五人龍圖閣直學士將樂楊時中立觀

文殿學士開封耿南仲晞道述古殿直學士上蔡謝克家
任伯資政殿學士開封呂好問舜徒觀文殿大學士邵武
李綱伯紀資政殿學士襄邑許翰崧老資政殿學士宋城
路允迪公弼延康殿學士董耘資政殿學士瑞安許景衡
少伊徽猷閣學士縉雲詹乂持國資政殿學士任城李邴
漢老資政殿學士曲阜顏岐夷仲資政殿學士真州吳敏
元中觀文殿大學士鄧城范宗尹覺民資政殿學士滁州
張守子固觀文殿學士祁門汪伯彥廷俊端明殿學士河
南富直柔季申資政殿學士吳興葉夢得少藎顯謨閣學
士丹陽翟汝文公巽端明殿大學士齊州呂頤浩无直端

明殿學士安陽韓肖胄似夫資政殿大學士綿竹張浚德
遠資政殿學士分寧徐俯師川觀文殿大學士姑蘇朱勝
非藏一端明殿學士解梁趙鼎元鎮端明殿學士海州胡
松年茂老資政殿學士德清沈與求必先端明殿學士雲
州折彥質仲古資政殿學士儀真劉大中立道資政殿學
士上虞李光泰發資政殿學士毘陵孫近叔詣端明殿學
士餘杭何鑄伯壽資政殿學士濟南王次翁慶曾端明殿
學士浮梁程克俊元額資政殿學士上饒余堯弼致勛端
明殿學士寧國章復季常端明殿學士宋樸端明殿學士
鄴史才德夫資政殿學士金壇湯鵬舉致遠觀文殿大學

士吳興沈該守約資政殿大學士建康王綸德言資政殿
大學士浮梁汪澈明遠資政殿學士萊州辛次膺起季資
政殿學士壽昌葉義問審言資政殿學士宜興周葵立義
觀文殿學士宜興蔣芾子禮資政殿學士仙遊葉頤子昂
觀文殿學士興化陳俊卿應求觀文殿學士壽春魏杞南
夫觀文殿學士婺源王炎晦叔資政殿學士鄱陽洪遵景
嚴觀文殿大學士四明史浩直翁資政殿學士鄱陽洪适
景伯端明殿學士金華葉衡夢錫觀文殿大學士溫陵曾
懷欽道資政殿大學士溫陵梁克家叔子資政殿學士德
清李彥穎秀叔資政殿學士吳郡范成大致能觀文殿大

學生金華王淮季海資政殿大學士華亭錢良臣師魏資
政殿學士臨江蕭燧照鄴資政殿大學士侯官黃洽德潤
端明殿大學士永春留正仲志觀文殿大學士吳興葛邲
楚輔端明殿學士邵武任希夷伯起資政殿大學士上饒
施師點聖與觀文殿學士廬江王蘭謙仲觀文殿大學士
餘干趙汝愚子直觀文殿大學士龍游余端禮處恭觀文
殿學士臨海陳騏叔進端明殿學士泉州傅伯壽景仁端
明殿學士江陰邱密宗卿端明殿學士崑山衛涇清叔觀
文殿大學士臨海錢象祖伯同資政殿學士嘉興婁機彥
發端明殿學士南豐曾從龍君錫資政殿大學士天水趙

善湘清臣資政殿學士東陽葛洪容父觀文殿大學士鄧
鄭清之德源資政殿大學士慶元宣繒宗禹資政殿學士
邛州魏了翁華父端明殿大學士邵武鄒應龍景初觀文
殿大學士增城崔與之正子資政殿學士浦城徐榮叟茂
翁端明殿學士永嘉林畧孔英資政殿學士餘干劉伯正
直卿資政殿學士黃巖杜範成已觀文殿大學士蘭谿范
鍾仲和觀文殿學士侯官陳韓子華資政殿學士慶元應
僊之道資政殿大學士嘉興李曾伯長孺資政殿學士隆
州李性傳成之端明殿學士金華王埜子文資政殿大學
士浦城徐青叟直翁觀文殿大學士威州謝方叔德方觀

文殿大學士濠州董槐廷植端明殿學士建寧蔡抗仲節
端明殿學士龍游馬天驥德夫觀文殿學士新安程元鳳
申甫資政殿學士閩林存以道端明殿學士蒲江高定子
瞻叔資政殿學士寧國饒虎臣伯武端明殿學士金華厲
文翁觀文殿大學士溧水吳潛毅夫資政殿學士嘉興沈
炎若晦端明殿學士閩許應龍恭甫端明殿學士都昌江
萬里子遠資政殿大學士醴陵皮龍榮起霖觀文殿學士金
華馬光祖莊父資政殿學士眉州楊棟元極觀文殿大學
士天水趙與憲德淵資政殿學士潼川姚希得逢原觀文
殿大學士敘州程公許季與資政殿大學士溧水吳淵道

父觀文殿大學士樂平馬廷鸞翔仲

朱熹尊洞霄宮
提舉題名記

臨安土人諺云東門菜西門水南門柴北門米蓋東門彌
望皆菜圃西門則引湖水注城中以小舟散給坊市嚴州
富陽之柴聚于江下由南門而入蘇湖米則來自北關云

二老堂
雜記

宋時武林馬塍藏花之法紙糊密室鑿地作坎覆竹置花
其上糞以牛溲硫黃然後置沸湯于坎中候湯氣薰蒸則

扇之經宿而花放

香祖
筆記

宋太學生俞國寶作風入松詞云一春常費買花錢日日
醉湖邊玉驄慣識西湖路驕嘶過沽酒樓前紅杏香中簫

鼓綠楊影裏鞦韆暖風十里麗人天花壓鬢雲偏畫船載
得春歸去餘情付湖水湖煙明日重攜殘酒來尋陌上花
鈿高宗微行見之笑曰詞則美矣但重攜殘酒終是寒酸
何不云重扶殘醉卽召見予釋褐

武林舊事

孤山涼堂西湖奇絕處也堂規模壯麗下植梅數百株以
備遊幸堂成中有素壁四堵幾三丈高宗翌日命駕有中
貴人相語曰官家所至壁乃素耶令御前蕭照往繪山水
照受命卽乞尚方酒四斗昏出孤山每一堵卽飲一斗盡
一斗則一堵已成畫若此者四畫成蕭亦醉駕至周視壁
間爲之嘆賞知爲照畫賜以金帛蕭無他長惟能使玩者

精神如在名山勝水間不知其爲畫爾

四朝閣見錄

杭州故內觀堂前有太湖石臥峰陂陀甚大其中鑿爲泓

沱相傳云思陵滌硯具也

研北雜志

杭省廣濟庫出售官物有靈壁石小峰長六寸高半之玲
瓏秀潤臥沙水道裙褶胡桃文皆具于山峰之頂有白石
筆山圓瑩如玉徽宗御題八小字于石背曰山高月小水

落石出畧無雕琢之迹

西湖遊覽志餘

婦女步通衢以方幅紫羅障蔽半身謂之蓋頭凡貴游出
令人持鍍金水罐子前洒方過車名曰水路此猶汴京之

遺風也

清波別志

紹興間都下酒肆中有道人攜烏衣椎髻女子買斗酒獨
飲女子歌詞以侑云朝元路朝元路同駕玉華君千乘載
花紅一色人間遙指是祥雲迴望海光新或記之以問一
道士道士驚曰此赤城韓夫人所製水府蔡真君法駕導
引也烏衣女子蓋龍云

林下
詞選

德壽宮有橋乃中秋賞月之所橋用吳璘所進階石甃之
瑩徹如玉以金釘鉸橋下皆千葉白蓮花御几御榻瓶爐
酒器皆用水晶爲之水南岸皆女童奏清樂水北岸皆教
坊樂工吹笛者至二百人

癸辛
雜志

宋時九里松三字吳傳朋說書說出知信州朝辭高宗云

朕有一事每以自歎卿書九里松牌甚佳朕亦嘗書之終
不迫卿當復以卿書揭之松門其後三字以金塗之紹興
二年頒黃庭堅書戒石銘于郡縣亦用金書人君不沒人
之善如此

錢塘
縣志

韓斬王世忠旣解兵柄逍遙家居常頂一字巾跨驪遊湖
山間李如晦者自楚州幕官來候改秩而失一舉牘憂撓
無計同邸強拉遊天竺過九里松值暴雨四散奔避李至
冷泉亭衣裾沾濕悶坐長嘆適韓公至李不識公見其貌
雄毅遂敬揖之韓公矜其憔悴問故李以實告韓曰所失
文字不是職司否曰常員也韓曰吾有一紙明日持贈命

小吏備詢其姓名階位居止之處李感激泣謝明日吏持
舉牘授之曰郡王所送仍助錢三百千李遂得轉京秩乃
修牋詣府展門生禮韓不與見

仁和縣志

宋時江西有張秀才者未始至杭胡存齋攜之而來一日
泛湖問之曰西湖好否曰甚好曰何謂好曰青山四圍中
涵綠水金碧樓臺相間全似著色山水獨東偏無山乃有
鱗鱗萬瓦此天造地設好處也語雖粗俗然能道西湖面
目形勢爲可喜也

癸辛雜識

杭人稱四司六局蓋宋時官府貴家置四司六局各有所
掌筵席排當凡事整齊都下街市每遇禮席以錢倩之四

司者帳設司厨司茶酒司臺盤司也六局者果子局密煎局菜蔬局油燭局香藥局排辦局也祇應慣熟不煩賓主之心今時雖無此名而禮筵率有包辦咄嗟而集他如珠冠禮衣方巾花扇綵轎盒檐幃幙吉凶器具皆有置質者猶行都之遺風也

委巷叢談

臨安城自過收燈貴遊巨室皆爭先出郊謂之探春至禁煙爲最盛龍舟十餘彩旗疊鼓交午曼衍粲如織錦內有曾經宣喚者則錦衣花帽以自別于衆京尹爲立賞格競渡爭標內璫貴客賞犒無算都人士女兩隄駢集幾于無置足地水面畫楫櫓比如魚鱗亦無行舟之路歌談簫鼓

之聲振動遠近其盛可以想見

武木舊事

西湖競渡自二月八日爲始而端午尤盛是日畫舫齊開
游人如蟻龍舟六隻俱裝十太尉七聖二郎神雜劇飾以
綵旗錦繖花籃鬧竿鼓吹之類帥守往一清堂彈壓立標
竿于湖中挂錦綵銀碗官楮以賞捷者有一小節級披黃
衫青帽插孔雀尾乘小舟橫節杖聲喏取指揮次以舟回
朝龍舟以彩旗招之諸舟鳴鑼鼓分兩翼遠近排列成行
再以彩旗引之諸舟競發先至標所者取賞聲喏而退其

餘犒錢而已

西湖遊覽志

清明前三日爲寒食節都城人家皆插柳滿檐雖小坊幽

曲亦青青可愛大家則加棗錮于柳上然多取之湖隄有

詩云莫把青青都折盡明朝更有出城人

乾道歲時記

同僚小集梵天寺坐間雨作已復開霽步至東橋玩月賦

詩二首有層雲生薄晚涼雨遍空山之句

朱文公大全集

臨安薦橋門外太平橋北細民張四世以鬻海蠅爲業淳

熙二年六月夜蠅在盎盡緣壁登屋上及人衣掃之復集

至于沾著肌膚不去張慨然有悟發誓云從今不復造此

惡業言訖蠅墜地

夷堅志

李唐初至杭無知者貨楮書以自給甚困有中使識之曰
待詔作也遂奏聞唐之壽杭人貴之唐有詩曰雪裏村烟

雨裏灘爲之如易作之難早知不入時人眼多買胭脂畫

牡丹

續書齋
題跋記

金鳳花如鳳唼飛舞每種各具一色聚開則五色成華自
夏至秋尤盛謂之金鳳花中都習宮闈娛語謂鳳兒花蕊
懿之生有鶯鶯儀于墨氏名曰鳳娘迨正坤極六宮避舊
稱曰好女兒花今行在猶然

四朝聞
見錄

杭州俗呼黃矮菜爲花交菜俗多南渡遺風賣冰者叫大
雪以大雪收者佳羅芝麻者叫何何舊姓何者鬻此故也

戒菴
漫筆

西溪留下西南三里有宋人禁酒牌卽高宗入山村酒肆

喜其供奉精潔御書界牌以賜曰不爲酒稅處是也後爲陶家廂理宗朝有陶處士隱此水竹田桑夫耕婦織有栗里之風皆山川幽寂之處也

西溪梵隱志

陸放翁初調官臨安有詩云小樓一夜聽春雨深巷明朝賣杏花都人稱誦傳入禁中思陵稱賞由是知名

堯山堂外紀

陸象山少時嘗坐臨安市肆觀棋者累日棋工曰官人日來看必高手願求教一局象山曰未也三日却來乃買棋局一幅歸懸室中臥而仰觀之兩日忽悟曰此河圖數也遂往與棋工對棋工連負二局乃起謝曰某臨安第一手凡來著者皆饒一先今官人反饒得某一先天下無敵手

矣象山笑而去其聰明過人如此

仁和縣志

小紅順陽公青衣也有色藝順陽公請老姜堯章詣之一日授簡徵新聲堯章製暗香疎影兩詞公使二妓肄習之音節清婉堯章歸吳興公尋以小紅贈之其夕大雪過垂虹賦詩曰自琢新詞韻最嬌小紅低唱我吹簫曲終過盡松陵路回首煙波十四橋堯章每喜自度曲吹洞簫小紅輒歌而和之堯章後以疾沒于蘇石湖挽之曰所幸小紅方嫁了不然啼損馬塍花宋時花藥出東馬塍西馬塍皆

名人葬處

研北雜志

向杭城市肆家有名相傳者如湧金門灌肺中瓦前羊飯

錢塘門外宋五嫂魚羹貓兒橋顧大刀熟肉朝天門戴家
磨肉石留園倪家犯鮓中瓦張家豆兒水雜貨場前戈家
密棗兒五間樓周五郎密煎金子巷口陳花脚麪食南瓦
子張家元子壩橋榜亭側朱家饅餡六部前丁香餛飩

果

錄

小經紀他處所無有者曰開先牌曰試籃曰掌記冊曰字
本曰諸般簿子曰交牀曰礮擦子曰油單曰蒲坐曰裁板
尺曰鞋楦曰棒槌曰錢索曰襍膊兒曰弩絃曰琴阮絃曰
棋盤曰壺籌曰印色盞曰扇牌曰香餅曰膠紙曰諸盤盃
兒曰香櫟絡曰弔挂曰髮塚兒曰頭髮日抹領日鈕扣子

曰搭羅兒曰鞋帶曰香袋兒曰符袋兒曰面花兒曰畫眉
七香丸曰穩步膏曰手皴藥曰頭髮掠曰紕刷兒曰篋子
剔曰消息子曰涼筒兒曰烟帚曰糊刷曰香爐灰曰藥線
曰燈草曰肥皂團曰烘籃曰食罩曰櫥梃曰砧頭曰竹釘
曰雞籠曰猫窩曰見成皮鞋曰舊鋪襖曰風箏曰口簀曰
粘竿曰釣鈎曰鬧蛾兒曰韃子曰千千曰絹孩兒曰竹猫
兒曰鶉鴒鈴曰促織盆曰蟲蟻籠曰猫魚曰老鼠藥曰蟲
蟻食以上諸物每一事率數十人各專藉以爲衣食之地

武林
舊事

臨安西湖舊傳南北兩山僧寺大小合三百六十後爲軍

營禁苑勢人園圃之所包占今存者不滿百

咸淳志

附郭二邑所營寺院內錢塘二百七十仁和六十五合三

百三十五所外七邑不與焉

杭州圖經

餘杭洞霄宮有道士誦度人經于龍潭上龍王爲現形請
宮中日課當日饋鮮乳二斤爲謝道士許之果得乳如約
數年後一日忽無道士訝之復臨水誦經龍王再現形曰
吾忝爲龍神但塵凡中欺取羸息則陰攝之前市戶有董
七者好舞智欺人故掠取其餘以供今此人他出其父淳
朴不罔利無從可致乳矣道士嘆息不已曰欺心事可妄
爲耶遂周行郊關一意導人于善

夷堅志

錢塘有道人業履爲生得錢卽沽酒放浪湖山間往來累年不逢知識一日爲寺僧修履口作吟聲若運思搜詩者曾訝問之笑曰今日偶得詩未成耳僧曰可得聞乎曰百嚙已休鶯哺子三眠初罷柳飛花僧宣揚其句白是人始奇之時宣和間也後不知所往

竹坡詩話

錢塘老儒葉森景修嘗登趙松雪之門松雪深愛之蓋謂其聰明頗讀書故也家住西湖所藏王右軍籠鵝帖石刻後有唐人復臨一帖副之誠爲妙品張外史一日賦詩貽之有云家藏逸少籠鵝字門繫龜蒙放鴨船

至正直記

杭城假山稱江北陳家第一許銀家第二今皆廢矣獨洪

靜夫家者最盛皆陸氏所疊也堆堞峰巒拗折澗壑絕有
天巧號陸疊山張靖之嘗贈陸疊山詩云出屋泉聲入戶
山絕塵風致巧機關二峰景出虛無裏九仞功成指顧間
靈鷲飛來羣玉堞峨嵋截斷落星間方洲歲晚平沙路今

日溪山送客還

西湖游覽志

杭人以冬夏二至後數九以紀寒暑云冬至後一九二九
招換不出手三九二十七籬頭吹觴栗四九三十六夜眠
如鷺宿五九四十五太陽開門戶六九五十四貧兒爭意
氣七九六十三布衲兩頭擔八九七十二貓狗尋陰地九
九八十一鰲耙一齊出夏至後一九二九扇子不離手三

九二十七冰水甜如蜜四九三十六拭汗如出浴五九四十五頭戴秋葉舞六九五十四乘涼入佛寺七九六十三牀頭尋被單八九七十二思量蓋夾被九九八十一家家

打炭擊

委巷叢談

候潮門外稍東有河自南繞城左以抵永昌壩兩岸相去數十尺水忽暴漲深可尋丈洞亦難涉故有橋以便往來初名礮木相傳錢氏偏據時旁堆礮木故名後稱普濟橋因近普濟寺也自來架雜木爲之苟簡取便目前豈知雜木易敗下爲濕氣鬱蒸上爲頻雨傾瀆不久朽斷過者陷溺主事王光佐見行人陷溺乃出無礙贖銀又得鎮守司

道二內臣樂助遂用堅木厚石石以砌岸以木跨之上覆

以亭永固之道也故易名曰濟川

仁和縣志

吳子明居杭之橫塘晚年閒步水濱忽見泥中一物蠕動疑爲蛇類細視之乃一鳥卵大可如拳心異之遂取歸寘之聖堂淨水盂中旋即漲大忽發大聲穿屋而出或以爲

龍云

癸辛雜識

徐君寶妻岳州人至元丙子巴延偏師破岳州被擄來杭居于韓蕲王府前自岳至杭數千里主者屢欲犯之終以巧計脫免蓋主者惜其姿色弗忍加害一日欲強逼之乃告曰俟妾祭謝先夫然後爲君婦未晚也主者允諾卽嚴

粧焚香再拜默祝南向題滿庭芳一闋于壁投池水而死
詞曰漢上繁華江南人物尚遺宣政風流綠牕朱戶十里
爛銀鉤一旦兵戈齊舉旌旗擁百萬貔貅長驅入歌樓舞
榭風捲落花愁清平三百載典章文物掃地都休幸此身
未北猶客南州破鏡徐郎何在空惆悵相見無由從今後
斷魂千里夜夜岳陽樓

輟耕錄

徐俊餘杭人偉貌豪襟詩復俊逸如綠醕醉空金鑿落銀
缸煖映玉交枝芹湖沙暖眠鷓鴣花塢春陰困海棠怪松
當道似人立葉落蒲林如雨飛亦可成家也又有西湖聞
笛詩一時傳之

餘杭縣志

元至元間杭州尚有火禁高彥敬克恭爲江浙行省郎中知杭民藉手業以供衣食禁火則小民屋狹夜作點燈必遮藏隱蔽而爲之是以數至火患遂弛其禁杭民賴是以安與廉叔度除成都火禁一意也

山居新語

餘杭萬氏有水盆一尋常瓦盆耳然冬月以水沃之冰凝成花跗萼檀藥皆成真花時爲梅爲菊爲桃李以至芍藥牡丹諸名花皆交出也萬氏歲必一燕客觀冰花焉

浙江通志

黃子久與客游孤山聞湖中蘆聲于久曰此鐵笛聲也少頃子久亦以鐵笛自吹下山遊湖者吹笛上山乃吾子行也二公畧不相顧笛聲不輟交臂而去一時興趣又過下

桓伊也

山居新話

至正丁酉秋八月予往錢塘西山普福寺時葉景修每舉趙松雪遺事有云一日侍行西湖上得一太湖石兩端各有小竅體甚平松雪命景修急取布線一縷扣于兩竅已而令人滌淨扶立久之清風颯至其聲如琴卽命名曰風篁歸雪川當易以絲絃上之爲小齋前松下之翫景修曰此前人爲之乎松雪曰否我自以意取之也其敏慧格物如此

至正直記

張伯雨嘗有春日遊南山約手書一卷詞致字法可稱奇品約云看花長安已是丈人之行問鐵鑪步聊從太史之

觀甫及春晴可無宿諾且鷺峰猿洞衆人何莫由斯顧靈
石龍泓賢者而後樂此緇塵弗汙碧嶺長幽仰探元豹之
深下笑飛蚊之聚風簟蕭爽憇德威二老之亭蟬冕輝煌
拜元祐諸賢之像徐行後長逸興超倫撫中岳外史之書
碑長虹貫日覓房山侍郎之題壁白雲啓扉放浪形骸抒
寫懷抱豈沙門不得稱高士而濁醪亦足名賢人追觴咏
之風流成談笑之故事盤飧爲具酌必真率會中車騎後
時割依金谷酒數

淨慈寺志

輔德侯周雄酷愛蟾所持一扇繪蟾于上及歿爲神以壽
蟾霧中捍寇至今廟中供案上亦恒有青蟾示現云

新城縣志

明初仁和卓公敬偶泛舟苕溪忽迷津泊蘆葦間登岸見
竹籬茆舍中一老人秉炬讀書留公憇息與語皆聞所未
聞問其姓名老人太息曰吾唐潘閬也生時爲建成太子
忤貞觀帝禍幾不測賴以僧服遁今相子骨法當大貴然
不令終如能棄家爲僧且得道吾所以延子至此使明哲
保身也因出緇服披剃具授敬散儒者以二氏爲誕又不
信鬼神揮手謝去天明復登岸杳無人居後敬成名革除
間殉建文帝難禍最烈其死事始末與閬前後合轍餘杭縣志
杭州府志在宋則有淳祐志咸淳志皆去取無法洪武初
徐一夔志頗稱簡明今不傳矣成化十年夏時正重修杭

州府志紀事脫畧筆力腐冗直可覆瓿耳一郡典故散于
各書今可考者僧懷顯錢塘勝蹟傳牧西湖古蹟事實范
石湖日錄周益公平園日記岳珂桎史羅大經鶴林玉露
方勺泊宅編行都紀泗水潛夫武林舊事周公謹癸辛雜
識齊東野語周昭禮清波雜志牟應隆隆山雜記錙孟熙
霏屑錄楊瑀山居新語張仲文白獺髓葉子奇草木子無
名氏夢梁錄陶九成輟耕錄劉一清錢塘遺事楊公濟西
湖百詠吳美中武林紀事此其班班者其他片言隻字散
見各書又不可縷數也

西湖遊覽志

按西湖志云夢梁錄二十卷錢塘吳自牧著乃云無名

氏周密字公謹號泗水潛夫今分二人俱誤

宏治五年壬子浙江鄉試時闌中夜半有二巨人各衣緋綠東西立大言曰三人好作事已而王守仁與孫中丞燧胡尚書世寧同舉及宸濠之變胡發其奸孫死其難守仁

平之

陽明年譜

西湖船製不一以色名者有鳴玉鏤金金勝寶勝大綠間綠游紅申屠仲權詩紅船撐入柳陰去釋道原詩水口紅船是妾家是也以形名者有龍頭白樂天詩小航船亦畫龍頭是也有鹿頭楊廉夫詩鹿頭湖船唱棹郎是也形色雜者有百花十樣錦錢復亨詩又上西湖十錦船是也以

姓名者有黃船董船劉船見吳自牧夢梁錄蓋大者謂之
頭船最大者賈秋壑所造車船也車船棚上無人撐駕但
用車輪腳踏而行其速如飛小者謂之瓜皮船廉夫詩小
小渡船如缺瓜歐陽彥珍詩瓜皮船子送琵琶張大本詩
瓜皮小船歌竹枝周正道詩瓜皮船小水中央又有總宜
船取東坡居士淡粧濃抹總相宜之句名焉李宗表詩總
宜船中載酒波凌彥种詩幾度湧金門外望居民猶說總
宜船是也泗水潛夫述武林舊事值探春競渡日畫橈櫓
比如魚鱗無行舟之路楊謹思詩大船撾鼓銀酒缸小船
吹笛紅繡窗今則敗舫數艘無復徵歌按舞者矣

杭州耆老會在正統間大理寺正郎子貞八十一封吏部員外郎孔希德八十禮部郎中蔣廷暉七十八處士項伯藏九十三孫適郭文敏皆七十三又有稽勲郎中鄧林布政使姚肇以寓公與會而年不及

完委餘編

碩德重望鄉邦典型酒社詩壇太平盛事吾杭士大夫之里居者十數爲羣選勝爲樂咏景賦志優游自如在正統時有耆德會有會文社天順時有恩榮會有朋壽會宏治時有歸田樂會人物皆一時之選鄉里至今爲美談

萬歷舊志

西湖八社一社戶曹員外祝時泰字汝亨號九山閩人光州太守高應冕字文中號穎湖仁和人庠士王寅字仲房

號十嶽新安人庠士劉子伯字安元號望陽仁和人承天
太守方九敘字禹績號十洲錢塘人江西憲副童漢臣字
仲良號南衡錢塘人隱君沈仕字懋學號青門仁和人一
社地紫陽詩社雲居山三茅山青衣洞七寶山太虛樓白
鹿泉元妙海會五岳樓星宿閣諸勝屬焉九山主之湖心
詩社岳祠林墓葛嶺蘇堤戒壇瑤瑤坡六一泉參寥泉大佛寺慶
忌池柳洲亭諸勝屬焉望陽主之玉岑詩社高麗法相烟
霞洞石屋洞水樂洞龍井棋盤山九溪十八澗諸勝屬焉
十洲主之飛來詩社靈隱寺三天竺九里松北高峰集慶
寺普福寺石人嶺韜光西溪冷泉亭呼猿洞諸勝屬焉南

衡主之月岩詩社勝界梵天鳳凰山萬松書院五雲山六
和塔浙江湖月巖亭天真寺龜田三一泉海鮮寺秦望山
諸勝屬焉潁湖主之南屏詩社淨慈寺南高峰法因寺虎
跑寺珍珠泉甘露泉藕花居雷峰塔金波園內六橋外六橋
肅愍墓錢王祠諸勝屬焉青門主之紫雲詩社靈峯寺玉
泉寺寶叔塔無門洞佛會寺雷院初陽臺諸勝屬焉南衡
主之洞霄詩社天目徑山洞霄宮翠蛟亭野翁亭東坡泉
瀑布泉茗溪葛溪大滌天柱九仙峯崑石柱諸勝屬焉十
嶽主之一社約凡往南山俱湧金城外候齊北山昭慶寺
候齊或買舟或肩輿各隨便只一僕相隨遲到者有罰凡

每會輪一人主之肉食之豆三蔬食之豆三菓餌隨設無
定品酒數行能飲者聽之會間清談除山水道藝外如有
語及塵俗事浮一大白凡詩命題止卽景物不取遠拈各
集衆思要在古雅爲貴南衡山人童漢臣記

西湖八
社詩帖

餘杭徑山錢塘靈隱淨慈寧波天童育王等寺爲禪院五
山錢塘中竺湖州道場溫州江心金華雙林寧波雪竇台
州國清與福州雪峰建康靈谷蘇州萬壽虎邱爲禪院十
刹錢塘上竺下竺溫州能仁寧波白蓮等寺爲教院五山
錢塘集慶演福普福湖州慈感寧波寶陀紹興湖心與蘇
州大善北寺松江延慶建康瓦棺爲教院十刹

七修
類稿

葛徵奇光祿樂志林園又得閨人唱和格雖不高亦自超

超拔俗

明詩綜
小傳

何姬楊氏海鹽人與夫共鬻仁和金殿撰姓家氏夫病割股無肉蓋未筭時已療其母矣夫卒終身茹素其保姓女兄如嚴師既使視姓亦如之姓嘗有中表赴鄉試主其家姬以肉一盞進姓姓尚幼問焉得此曰此某兄鎖院所食一塊肉需作文七篇姓啖而愧之其因事誘迪類如此姬壽八十餘姓及第姬猶及見云

羅暹春
何姬傳

杭州府志卷一百九終

杭州府志卷一百十

前志原委

地志昉於班史後世遂有專書黃圖其最古矣浙省則有
唐徐靈府宋張文規左文質談鑰張元成李宗諤施宿張
昞羅璿姜嶠曾賁陳百朋諸家其說杭事者臨安三老而
外又有楊蟠傅收潘景夔諸家雖或存或佚而承修續藁
端委可求爰自周淙以下各家及州縣諸志相沿可考者
列其書名卷帙并節其序文可採者錄之以備觀覽

府

宋 乾道臨安志十五卷長興周淙撰

陳振孫書錄解題
府帥吳興周淙彥

實撰首卷為行在所於宮闕殿閣全不記載藉曰禁省嚴秘不敢明著其視宋次道東宮記何其大不侔其他沿革亦多疏畧然淳有才具其尹京開湖濬河有成緒今城中河道通利民戶為脚船以濟行旅者蓋自此始

淳祐臨安志施愕撰

考卷無

咸淳臨安志一百卷縉雲潛說友撰

潛說友序畧太平興國三年吳越以其地

歸我職方氏是歲杭始置守丞建炎陞府遂為行在所按古志杭舊屬會稽禹於此舍航而陸故名嘗試觀之有車船擺擡之蹟故其人至於今忠以勤有苗山之貢故其人至會故其人至於今勸於為善有織貝橘柚之貢故其人至於今知其尊君而愛親錢氏生長其間性習自然國三世四王而終不失其臣節迨宋之興也深察夫人心歸德之天如川斯赴天地之間燥濕風雲萬物一氣杭獨為天下先者以先王聲教之所漸者遠知帝王正統所在焉故也自時厥後我國教之如在甸服率選公卿大臣寵綏之湛恩醲化涵浸滋久益固結而不可解南渡艱難之際旄倪提携左簞右壺牛酒相屬於道頓首六糾之下如見父母雖屢更大震撼而莫之變迄用永我命於茲新邑迹是三

百年間杭之有功於國家也甚大而祖宗之有德於杭亦深矣開慶羣小誤國召我一時謀臣或倡異議幾播根本賴先皇帝獨倚今太傅辨章國公外頓八紘內維九鼎宗廟社稷之靈恃以安寧卒之披攘蒙霧再奠宇宙至今入街九陌歌鼓四時往往相與咨歆不圖復見今日嗚呼我理宗有德於杭也不久大歟暇日視故府閱郡乘或病其漏且舛乃葺而正之增而益之凡為圖為表為志總百卷而冠以行在所錄尊王室也既成上之天府以備考數之焉一

明 洪武杭州府志天台徐一夔撰
卷詳

永樂杭州府志
撰人卷冊皆未詳

景泰杭州府志
撰人卷冊皆未詳

成化杭州府志六十三卷郡人夏時正撰
夏時正序畧郡有舊志洪武中

郡學教授徐一夔所修永樂間有續志景泰間又續之而今官府皆亡矣前年巡撫浙江都憲劉公敷欲修之不果

去年巡按浙江監察御史建寧吳公文元姑蘇夏公璣浙
江布按二司方伯祁陽寧公良昌黎杜公謙大叅嘉魚李
公田憲使汚池戴公珙憲副豐城楊公瑄當塗端公宏咸
謂當修而不可終不果也以余老閒於家枉過見屬淺薄
難堪辭再三僉問其人乃以南京刑部郎中仁和項君
麒士嘉禾周君鼎洎錢塘劉英仁和陸垵薦遂以今年二
月十七日開局於城北妙行寺志書泉上萬佛寶閣是日
寄杜二公枉為勸賓公躬為發凡言例授已而還於時項
君以奉親不暇辭弗至無何周君歸不再來而終其事者
劉陸二子爾既而監察御史湖湘方公昇八閩陳公紀咸
巡按蒞杭前後過臨方公其代吳公者也每為論列示其
指歸夏公偕來又復無時存省而郡守淮陰陳侯讓下車
重詢茲事獎勸惟勤於是二子知脩不懈益虔自朝日昃
至夜之分味批墨勘心口相警是冬孟月書成總計六十
三卷而目錄凡例纂圖別為一卷書呈寧杜二公復加校
定將刻之并屬敘於余乃言曰自洪武至今百有餘年洪
武舊志永樂景泰之續得之民間脫謬殊甚官府簡牘莫
得盡稽故先彫殘傳聞彌寡錦君悉心推訪雖僅有得實
萬漏而一耳自今不書則益遠益昧益無所書矣於是
諸公之所以拳拳不可終已者有足尚而此邱陵川澤其

後爲高爲下庶有所因也 甯良序畧杭之地志修于潛
說友再修于徐一夔再修于永樂景泰間之朝遣諸君子
亦可謂備矣而必欲再修之者蓋說友當咸淳之間宋室
偏安多言行在之事而條目不倫一夔當洪武初天下始
定又以前元闕于修志致多脫畧永樂景泰間復雜采
于人不出一手杭之地志必于今而後可謂大備矣

萬歷杭州府志一百卷郡人陳善撰 陳善序畧杭爲天下

啟都山川形勝物產才賢視他郡特異宜有文獻以彰盛
美而郡乘弗稱曠且百年識者病焉前督撫常熟徐公深
憫舊編脫爛圖惟更新乃謀於學使陝右喬公俾與是役
而先郡守白下吳公今郡守歷下劉公協心並贊樂觀厥
成諏日戒期責成於僕郡公委幣縣吏具飡仍選諸生之
秀者與共校讐開局於褒忠祠諸共事者凡十二人始竟
其役者僅五人綜括舊文證以傳述芟繁雜穢故實罔遺
則諸生之力爲多若國朝名宦人物及全編中諸多論敘
此爲僕所竊取者不敢妄也又以郡之大事不可無紀爰
自三代迄元泊國初迄今諸可備覽鏡者各彙爲三卷編
年則準諸春秋分注則倣於綱目義關勸戒傳備信疑始
事於萬歷丁丑五月成於萬歷戊寅十二月爲目凡三十

七爲卷凡百爲書凡二十八帙徐棻序畧予奉璽書撫浙輒繙舊志視成務猶然成化年間籍也文獻不徵空言亡補孔子膏嘆杞宋今觀杭志文獻謂何矣西湖在杭大澤之壘空耳能文者志其游覽又志其餘而杭闕如謂非吏茲土者之責且欲以修憲齊政酌張弛之中而不易土俗之宜法其治狀而表其風教百年之間漫不可考遵何繩墨哉續往牒待來者與之更始其在今日亡何諸大夫相與輯成之子手一帙而讀焉見其凡例品目刪潤裒益有味乎其志之也按今思古吾知有合矣

國朝

舊杭州府志四十卷關西馬如龍撰

王揆序略宋有三

曰咸淳明則有洪武永樂景泰成化萬歷五志成化志僅存而萬歷志則自三代迄明數千百年間治亂因革考據詳贍後此百有餘年固絕而莫之續也今

皇帝御極之二十三年俞禮臣請

下詔

修本朝一統志天下郡縣徵文考獻惟恐後期而郡太守關西馬君以博洽之才綜著述之任縉紳縫掖罔弗周諮野乘裨官咸加蒐訂聚耳目所羅致者合諸舊志而修貫

之譌者正闕者補疑者核其實元者芟其蕪三易稿始成起例發凡要歸盡善余以史臣拜典學之

命二

載于茲鞅掌作人幸告無罪頃者決科省會而是書適潰于成顧豹文序略吾郡之志今日僅而見之者于勝國

則有成化于趙宋則有咸淳成化之志極其闕肆而時有不經咸淳之志則爲賈氏一門之書徒餘其非以欺世耳敬亭之于萬歷盡刪而棄之不可謂非無識也然兩志由是遂亡君子惜之記不云乎衣服在身不知其名謂之罔吾浙于春秋左氏所紀爲略而吳越春秋越絕二書並行于是孫武伍員之霸功范蠡文種之殊績顯顯然微諸耳目後之讀者爲之膽張心動鬚眉歷然非山二書之功乎而奈之何其盡刪之也我

國家底定九有廓清四海武功已奏文教聿興

聖天子思十五國風爲政治之本于是特命天下各勒成一書而見五先生來典吾郡以司馬之材奮

董狐之斷四聘名儒搜討隱僻掛漏以續萬歷之所未足

吾讀之有三善焉能撮前人之長而不遺其細使吾郡之典章如觀掌果如數家珍一善也武林爲宋氏故宮得稱城闕邇來忠孝節義理學文章哀然作冠冕領袖潛德幽光從茲不墜二善也賦役由減以至增河渠由開而恐塞

以至江海之列駐防歲時之載淳樸近日東南當天三
分之二是陸海神臯也讀是書者可以觀民風可以占主
德可以恢吏治可以識兵機三善也先生以名孝廉饒經
世大略當吳逆煽亂時以赤手守延綏川陝之勢不能復
合績最奇今守吾郡肅清綱紀大小畢舉而又以暇從父
老子弟徵求故典以成是書古人云以整以暇後之讀是
書也于以規公之治此

其大者矣

李鐸序

國家之傳信莫如史州郡之傳信莫如志而志與史實則互
相表裏者也故郡邑不可一日無志猶之

國

家之不可一日無史杭為海內奧區名山大川甲于天下
蓋東南之一大都會也襟長江帶瀛海天目為萬山之宗

而天挺其秀西湖為一郡之勝而地效其靈秦漢以來皆
屬之會稽郡自是之後雖沿革不常要為東南財賦之藪
人民廣眾賦役殷繁其後宋室南渡建都臨安是郡遂為
京邑城池日以廓戶口日以增宮室廨宇陵墓祠廟日以
繁多歷世忠孝之士功烈之臣貞娶之婦詞章之客紛紛
紘紘千百年于茲皆足以風世而勵俗英賢名宦之善政
嘉猷良法美意足以為後人之法則而楷模溝洫田疇徭
役郵政學校禮制兵防選舉之大星野形勝祥異之分舊

志雖有成書而簡編多殘缺失次前刺史馬公增修其志
咸各彙為一編使觀者易于考訂誠善舉也吾聞風俗與
化移易務在因時而置宜後先雖
有同揆寧不日遷而月異况我
聖朝王會圖書之盛先被四表要荒之外咸貢車書以備史臣
之贊述矧茲東南重地兩浙名區豈容一日缺其紀載乎
予也不揣謏陋書以見聞爰附其近事于編末庶
後平予者之源源相續不致委是編于草莽云爾

錢塘縣

明 萬歷錢塘縣志十卷新淦心湯撰

是編者察吏所

以良窳財賦所以盈縮人材所以虛實戶口所以登耗風
氣所以醇侈于以蚤見力挽酌弛張而分輕重此可以宣
教風

國朝

錢塘續志真定梁允植撰

梁允植
序畧

今上御極之十有一年四方嚮化海宇同風凡累朝未闢之疆
土悉隸版籍

祖

天子開明堂受方物因考圖數百愷然而興曰此非我宗積累之久櫛沐之勤無以致是今將齊萬方之心志俾出于

一秀樸以周知剛柔奢儉之宜爰

命修

一統志以昭示永久于是部檄下直省各直省以部檄下

所轄郡邑而允植適剖符來令錢塘快睹修明盛事竊念

一統志之成必自一邑始誠使邑長吏各愷其事以上諸

郡則爲一郡之書郡長吏各總其要以上諸省臣則爲通

省之書彙諸省之所登而臚陳之加詳核焉于以播之邦

國垂之萬世則爲大一統之全書矣然則一邑者一統之

所權輿也錢邑舊志爲故明神宗時聶令心湯增修距今

六十餘載其間代已更革急有俟于後人之補葺而兵燹

凋殘故家遺籍十存一二卽零碑斷碣亦半沒于荒烟蔓

草之中如是而欲訪求廢墜搜討故實以成一邑之勝觀

不誠難哉所幸城郭猶是湖山如昔夢華桑海之傳東湖

西臺之紀側出于城郭既燼之餘猶足供今日之考證逮

入

國朝以來割城分閫節制上游遂爲全浙重鎮三十年間人文

秀美風俗醇厚其卓越可傳者筆不勝書用是輟簿領之

餘暇與邑中賢士大夫憑今弔往孳孳矻矻訖有成書較

聶令故帙
殆加半焉

錢塘縣志南康魏嶸撰

錢志補錢塘吳允嘉撰

仁和縣

明 永樂仁和縣志

撰人卷冊
皆未詳

嘉靖仁和縣志邑人沈朝宣撰

國朝

仁和縣志二十八卷三韓趙世安撰

趙世安序略仁邑
領九縣之首與錢

塘分治會城
自有宋至

皇朝

幾七百餘歲前此為錢氏國都為南宋帝輦歷元以迄勝

國號稱劇邑牧茲土者雖受成于上而承流宣化較十一
州之邑為難乃萬家煙火五方雜糅率以
樂土歸之按其名則是覈其實則非由

杭州府志

卷一百十

前志原委

六

國

初至今以余所聞已爲數變幼時家叔祖君隣公以平南
將軍治爲沃壤願得一至其地登臨眺覽窺大邦之名勝比
俗詫爲大人宦所東道出武林隨地寓目但見郵傳繁多
長侍家苦衙煩酬應邑令嘗夜不能寐不意今者承乏是
供億良耳聞目見者而身親任之甫二載會有修志之役
邑昔郡中耆舊文學廣搜博採遲之歲月始得勒成一書
題延郡中耆舊文學廣搜博採遲之歲月始得勒成一書
凡體國經野貢賦典章人文禮樂屬在錢塘者不敢掠美
其得失誠首郡之模表也然予受事之初苦無舊志雖載
筆編摩止取附見郡乘者以先之最後得沈朝宣抄本歷
年既久不無闕畧幸藉諸君子之力舊聞新紀捆載而
益耳日所未及然闕疑訂僞其慎其難今而後庶可按籍
而求鑒往來其于政教未必無小補云邵遠平序文
不錄顧豹文序吾郡負郭爲錢塘仁和錢塘名最古爲
秦時建而仁則朱梁均王龍德二年析錢塘鹽官二縣
置錢江縣是時吳越屬錢氏朱梁之龍德二年武肅之天
寶十五年也吳越備史云割錢塘鹽官各半及富春長壽
安吉二鄉置錢江縣是也宋太宗太平興國三年錢氏納
土四年始改錢江爲仁和至高宗南渡建炎三年自建康

如杭州升爲臨安府而仁和與錢塘俱爲畿輔地矣蓋嘗攷山川形勢及建國立社之故而知古今有必不可同者齊之所封者營耶卽臨淄地也自南燕一移廣固而益都爲重作青齊之鎮而言臨淄者卽蘇秦後譚二十一萬之衆後皆遜于廣固矣秦之所霸者咸陽所謂金城天府也自西漢一移長安而長安爲重作嘶函之鎮而言咸陽者卽舉孝公創造之艱商鞅控制之烈後皆遜于長安矣由是以思郡縣之沿革因于山川山川之堅瑕因于形勢故以吾郡言之爲鹽官爲餘杭則以錢塘爲嚴邑壯縣此自唐以前言之也若隸臨安隸杭州始于錢武肅成于宋建炎則又以仁和爲嚴邑壯縣此自唐以後言之也仁和之誌久未有成書鄉先輩沈公朝宣僅有藁本又零落失次且自萬歷之初迄我朝

今上之康熙相去且八十年縱其書完善其所宜補者多矣吾嘗謂吾郡之人材風俗物產土田爲東南之股肱者自唐以前則俱當歸之錢塘蓋朱梁龍德以上尚無錢江安得有仁和武肅析而爲二建炎從而定之于是與錢塘夾峙則自宋以下當悉稽往牒舊史以銓序其隆替甲乙世之淺者僅以仁和視仁和于是五季之戰爭南宋之賦斂舉

不能悉其故而號爲雄辨者則又牽引錢塘之所載以實之使涵渥無別涇渭莫辨皆非著述之才也邑侯趙公以廉律已以恕待物修舉廢墜百務並行會有一修志之役一筆一削皆質諸故老驗諸遺獻卓然成一家言仁和之有志蓋自公始矣按錢江縣之立也吳越備史云錢江縣治在今武林門內梅家橋南而冊府元龜云晉天福七年勅州縣名有與高祖諱犯者悉改之改杭州錢塘爲錢江陽志輿地廣記亦云晉天福中避高祖諱改錢塘爲錢江後別置錢塘與錢江分治然則仁和本錢江錢江亦本錢塘亦一縣耳而今之錢塘非昔日之錢塘乎兩書各有所據者姑存之以質之博雅君子是書之成學士邵戒三實襄其不及焉若余之弁鄙從事校讐無能爲役也

海寧州

宋 海昌圖經十卷括蒼潘景夔撰

樓潭海昌圖經序郡邑之設尚矣自元和

郡國志及寰宇九域等書皆受命于朝四海之內一無所遺卷帙至繁故當識其大綱而已厥後郡各有書則登載已詳足以備史家之採擇開卷而知其人之才否然搜討貴博而簡別不能精紀述務實而去取或不當敘祥異則

易失之怪書人物則多失之夸列守宰善政而載筆者亦與焉龔黃復生人且不信乃併與其可傳者掩之皆圖志之疵也海昌爲今畿縣令尹古括潘侯景夔下車以來慈祥臨民儒雅飾吏政成暇日撫臨安志全書增考故牘命秀士相與訂正之歷代之沿革山川之向背風俗人物賦役土產凡一邑之所當問者會萃滿編而以碑碣紀咏次之將與斯人仰許睢陽之餘烈挹張無垢之遺風以庶幾于起敬起慕垂數載而書成將鏤之本邑尉玉牒崇謨潭外弟子也介以請于家君敘其事于編首機務鮮暇乃命小子書之敢誦所聞以塞嘉命先祖帥岐公頃由工部郎知處州作括蒼志繪郡境爲圖以便觀覽遂不失圖經之旨後有作者雖或加詳實本諸此云時在嘉定二年立冬之日

明 永樂海寧縣志六卷邵武曾昶撰 沈升永樂海寧縣志序略永樂戊戌

天子命儒臣纂修厥典仍遣使四出網羅天下放失舊聞凡六合之內八方之外有闕風教者咸使采錄悉上之海寧古號海昌又名鹽官或爲州或爲縣歷代相傳沿革不同我朝廷建爲縣舊有海昌圖經先賢錄皆鄉耆所著今

述其舊而新是續皆詳備焉事以實紀物以類分以類相從輯成六卷總名曰海寧志

海寧縣志九卷麻城蔡完撰

蔡完志序略自拓林來盤踞

力捍禦晝夜靡寧遑復爲他計哉然余心終缺然也是縣古之名區在杭郡爲首邑浙以西莫先焉迺謀于博士師生訪諸民間得永樂戊戌舊稿巨束前訓導會昶所修者也蓋迄今百有四十年矣又請于諫議杞山先生得宋本嘉定圖經令尹潘景夔所修者也蓋距今三百五十年矣隨又請得續志二帙殆亦鄉哲所裒而翁校定焉者于是乎足徵矣旣而殘篇斷簡紛然雜出而昔銘碣自獻于土若有冥契凡若干日而粗就得九卷焉地理者以言乎提封也田賦者以言乎任土也建置者以言乎都邑也禮制者以言乎儀則也代天理物則有職官明倫振德則有學校明目達聰則有選舉鍾靈毓秀則有人物考古拾遺則有雜志彙而成編是役也校讐于內則教諭張志訓導蔡惟孝李玉潤庠生吳必學徐一卿贊勦于外則縣丞張杲楊人紀主簿置鈿而督工則典史王國佐因併書之

海寧縣志九卷海鹽董穀撰

萬歷海寧志補四卷朱廸撰

國朝

海寧縣志十三卷安陽許三禮撰

許三禮康熙海寧縣志序略寧邑之志粵

自宋咸淳以來其在于明有蔡令志有趙學博備考蔡本

今上

辛亥允大學士衛建言下直省郡國修志前令姜因得請

邑之士大夫備文獻者從事會以事去官不克竣癸丑冬

天子

命來令茲土載星不遑其局敢有及于鉛槧之役念邑乘

甲

令所急歷代之典故在焉昔賢之政事係焉魁梧長者節

義名賢其焉山川草木則存乎其舊風俗歌謠則係乎其

時或沿或革為損為益亦當代得失之林也遂以告于邑

之士大夫星分基置按部考班爰及二載而書告成陳

秉直康熙海寧縣志序略海寧省會左輔也星分牛斗負

山環海據三吳之上游為兩浙之門戶沃壤繡錯名賢輩

出誠東南之奧區舊志殘缺修于故明嘉靖己卯距今百

二十餘年其間風會變遷沿革損益多致散軼而失傳即

載諸故冊者亦班剝蝕嚙而不備非所以彰鉅典詔來茲

也今自我朝上至千百年來纂修刪定天文地理學文章忠孝節義榮若列星因時補救灑沉澹災悉考鏡而可循若政治若兵防若職貢揆古準今率循無斁約而該徵而信核而不誣以嫌于古作者之林何多讓焉

富陽縣

明 富春志六卷樂平吳堂撰

詳大年序略富春舊志頗殘缺失次今令吳君始重

修之摭抉舊聞廣詢故事詳審精密可以垂示久遠既刊爲書今吏部侍郎趙公日新歸省命予序其首簡

國朝 康熙富陽縣志十二卷長冶牛奐撰

康熙富陽縣志十卷太倉錢晉錫撰

餘杭縣

明 成化餘杭縣志

撰人卷册皆未詳

嘉靖餘杭縣志一卷 頴上王確撰

萬歷餘杭縣志蒙城戴日強撰 卷冊未詳

國朝

康熙餘杭縣志八卷 奉天張思齊撰

張思齊序略餘杭最爾逼近會城山川秀麗風氣淳樸但地當天目萬山下流每遇洪水泛漲衝決不常又土瘠民貧谿山叢薄易以生奸司牧者催科撫字視他邑倍難臣方鯢鯢慮無報稱獨念餘杭所最難者莫如水患年來開濬南湖賴以稍平至編審賦役矢公矢慎七十三里咸樂徵輸復設里社講鄉約宣揚

聖諭

嘉惠元元右文盛典是書也且充輶軒使命佐太史之歌風矣

康熙餘杭縣志八卷 晉安龔嶸撰

龔嶸新志序略謹按邑乘前成化嘉靖萬歷暨

我

國朝

皆有志而沿革廢興多所未備載者集邑之卿大夫鄉老搜采見聞在邑言邑如昔書者舊紀歲時各因土俗以備職方星野則躔次女牛疆界則分從禹甸建制則有舊學

新學舊城新城而山川則有雙徑祝釐洞香提舉及上下
湖之菁渚獨松關之險隘尤為利害大關人物則有紫陽
龜山倡教文學蔚蒸風俗則男習農桑女勤蠶織猶留上
古淳風其山川土田戶口賦役較他邑更宜詳年來水旱
游臻不無代謝自受
命後察邑之宜修復或仍前令所存或補前令未及築城
墮葺學校建倉廩輔滾壩以及惠民卹典讀法懸書之屬
次第舉行備書以當入
告凡官師選舉節孝賔耆皆諮訪故老仍取學校公呈不敢
遺尤不敢濫而有前志未備廣為搜羅以補缺畧彙為大
觀庶昭一代之鴻
文成千古之憲典

臨安縣

明 臨安縣志八卷新淦廖瑜撰

陳珂序略臨安舊無志

年政通人和百廢具興乃聘儒碩延之家塾旁搜博採手
自刪訂比若干月成編臨安杭屬邑也天目特峙其西錦
水交流其下為東南諸邑之勝土沃民勤號稱善地忠臣
烈女鴻儒碩德代不乏人若錢氏之四世五王其有德于

斯民甚厚其有功于先代甚大是尤他邑所未有而不可
泯焉者也。是宜廖君急先務而爲之也。志凡八卷其事該
而核其義嚴而正其慮深而遠蓋非徒備故事而已。臨安
之人其亦有永賴也。夫君名瑜字宜猷先任仁和丞有爲
有守獲上信民旣而署縣篆事署富陽篆事者幾三載綽
綽有聲故上下交章薦達未及六年而遷今職云 呂和
序文
不錄

萬歷臨安縣志四卷溫陵黃鼎象撰

黃鼎象序按邑志輯于嘉靖初年隆萬以

來纂修之議缺焉未舉而邑中之沿革廢置與夫汚隆盛
衰嫩慝之故前志不及載間附見于郡乘中然未之備也
余承乏茲邑夙夜兢兢問政利病探風考俗稍稍有聞又
嘗值歲荒奉賑窮山極谷親履其地得之目擊爲多乃以
所見所聞參之舊志中所傳聞或缺略而不盡或乖舛而
未合以請于邑薦紳先生賢士君子議相與復輯之以示
來者事旣竣爲志者十爲目者六十有三條貫畢舉巨細
靡遺纚纚具矣余乃敘之夫臨安非錢武肅王所興地乎
當其匹夫崛起從軍討賊臨第一彈丸始事之區乃能奄
有東南并十四州之地授之後人以俟真主之興封府庫

籍郡縣歸命于朝故蘇子瞻稱其有功于朝廷甚大噫嘻
子瞻亦但就已事論耳其後宋室南遷而天子宮闕之都
偏安杭郡則錢氏一旅實始基之綿趙宋帝祚之傳又百
餘載而臨安始稱內地矣此尤其功之大而子瞻之所未
及言者也獨怪臨安置縣繇漢迄唐歷代既遠桐鄉鄴令
豈盡乏人何當事者竟無有一人懷根本之慮卽以武肅
王開國雄圖力能築杭城七十里而不能爲湯沐所生之
民華路啟山造城郭溝池之固但歲時至邑中會父老子
弟衣山木以錦誇富貴榮耀而已至今更茲土者尚有遺
議焉邑故多奇峯幽澗而天目之山苕溪之水爲最勝其
淳發于文人鍾爲村人傑士往往有之然以昭明太子修
禪山中掬靈泉而復已盲之曰此山遂以目名爲其所據
無論他羽客緇流不得而奪雖以武肅王英雄蓋世之姿
跨有郡邑甲兵之盛亦不能收此山之名爭爲已有甚至
邑治有遷徙世局有互換法令有遞更東西兩目之稱千
百世而如故然則山川以人重耶人以山川重耶余是以
蒐往牒採輿論以成書而于官師人物志尤所重也賢有
司三歲一遷其在事賢否優劣昭人耳目去後之論易公
獨其鄉人往哲如吳越王以武肅常侍以文開越國而成
晉書初亦何費雖黃而有不盡然者其人已往氏各有喙

或此抑而彼伸或甲可而乙否孰從而一之余快賢是虞
亦何敢妄加華袞以滋愛憎之門但寧刻無濫于舊志所
傳官師人物外其有宦績可書而鄉評足錄者令三人廣
文二人鄉薦紳四人節烈多于是矣而孝行無取焉其嚴
如此太史公網羅舊聞上下千載周游歷覽幾天下半始
退而修史紀然且不免于是非謬聖人之議余以夏蟲語
冰之見揚扝幾何惟是百里提封巡行無非事者蓋嘗登
天目天柱之峰觀所謂龍飛鳳舞憑而弔之十錦花封之
蹟猶若有存而與其後子孫遺黎朝夕從事士大夫君子
幸不鄙而語余以故得存而論之是非謬否余不得而知
矣之

國朝

康熙臨安縣志十卷吳陸文煥撰

陸文煥臨安縣舊志序茲邑昉于漢臨水

臨安之名代易今仍舊也山川鬱盤土風淳古在西浙眾
山中爲輿區爲人文淵藪爲鑒鏗所居八百山爲仙釋玉
洞寶坊爲錢裔武肅四世五王之湯沐爲南宋建炎間遷
都武林之馮翊扶風晉之千常侍宋之吳竟陵以史才經
術著謝太傅以高臥東山聞于後錢氏希聖希白輩以才
藻冠江左文獻代興余以甲寅相月承乏茲土接見士大

夫翔翔雍雅吐辭皆三代禮樂多士有圭璋氣諸父老有
 如桃源中人余方飲永戴星簿書偶暇思一仰大人之偉
 悟立身焉挹碧淙錦水之澄洪爲廉泉焉聽學士松之濤
 聲洗塵襟焉觀繡裹山川之爛熳學製錦焉而皆未遑也
 一日士大夫手邑志示余漢晉以來二千餘年之掌故炯
 然在目兩天目而下百堰塘而上之高深平衍瞭然指掌
 綱舉目張臚分品列官于斯生于斯探風于斯者皆不可
 以不觀疆域修廣水山清穹濶懸白練路夾蒼虹城成衆
 志里播仁風志與地琴堂峩峨類官翼翼事神牧民薦馨
 食力郵傳禮賓咸修厥職志建置設官分治民牧爲先吏
 才調瑟道化鳴絃咏歌沐浴斯愛斯傳志官師保障翰屏
 撐天捧日文武忠孝節義隱逸揚于王庭榮以史筆志人
 物縹壁徵賢蒞榜通籍東箭南金貢舉及格授奮彬彬光
 裕奕奕志選舉三農均徭兩稅平賦民版重登壤則可敷
 衣食兼資商民交裕志田賦周官六行先朝六諭善俗化
 鄉引年遵度彌盜澤枯畢張治具志保郵民生在勤人道
 伊邇職方保章爰詔閭里寶壻含貞捍災迎社志風土仙
 侶禪宗往來兩目漢篆唐碑標奇嶺谷玉洞雲深松陵風
 肅志雜紀鐵券金章照耀圭璧琬琰琳瑯鏗鉤金石書籤
 詩板漱芳瓊液志藝文余每思採謠問俗亦近世通變得

失之林也我臨其當借箸而籌乎天開兩目地敷十錦川
原繡錯王跡猶新披圖覽志俯仰興懷為我臨官師士民
垂金鏡也為昭代國書傳史彰黼黻也諸君子凜成憲據
舊文而次第哀益之厥功偉哉觀天道驗人事監于古而
儆于今是在史才夫史以翼經志以備史茲編其有合于
存古訓今之義乎自今而往上者廉敬廉善下者遵道遵
路老者教孝教忠少者學詩學禮秀者興賢興能樸者問
耕問織我臨舊德先疇高曾規矩求之志中未嘗不往往
而在以余之樸學如徒以厄言綴簡端想非廖黃諸公意
亦非邑士大夫所望于余也春秋傳曰著以傳著疑以傳
疑言史貴信也不揣固陋繼君子而
翼厥成若修明之責敬俟之來者

於潛縣

國朝

康熙於潛縣志八卷遂平趙之珩撰

趙之珩序略潛以

人文之盛不足以擬通都列郡又疊承兵燹之餘典秩散
失文獻罕徵故蒐考之難什百他邑然而山川峻偉甲于
東南天目之隈苔水出焉語其形勝實全浙之祖餘也且
習尚淳固潛德幽光指不勝屈爰與諸儒互相考訂或採

之遺編或詢之故老凡耳目之所得及傳聞之無異辭者臚而列之視舊志稍益焉

新城縣

宋 乾道新城縣志耿秉撰

卷冊未詳

明 景泰新城縣志邑人凌誌撰

卷冊未詳

嘉靖新城縣志寧國袁澤撰

卷冊未詳

嘉靖新城縣志瀋山聶瑩撰

卷冊未詳

萬歷新城縣志四卷益陽溫朝祚撰

國朝 康熙新城縣志八卷渤海張瓚撰

張瓚序略新志肇宋乾道入元而亡明袁

祠部凌大參以暨寧國袁公瀋山聶公雙江方公嘗屢修之迨今百年闕焉失載瓚不敏來領斯邑嘗思一補前人

之未備然究以才儉三長中止會

天子允閣臣之請下郡縣纂輯成書遂同學博羅君懋蘊延錢

塘張子敬邑士袁子潞相與討論舊章綜核近事
汰其冗者正其訛續其闕者志于是觀厥成矣

昌化縣

明 嘉靖昌化縣志九卷六合馬逢伯撰

嘉靖昌化縣志無錫華文甫撰

卷冊未詳

萬歷昌化縣志十卷臨淮周洛都撰

國朝 昌化縣志十卷邑人陳秉謙撰

昌化縣志二十卷南城王近三撰

